

Jaoca Icantacari Yora Iotantatsiri

PROVERBIOS

Oca sanquenarentsi oquenquetsatacotiro iotantsi, aisati jaoca ancantajeiteari asavicanteari cameetsa.

Ontimimotanteeri iotantsi

- 1** ¹ Jero icantiri Salomón, itomini David, pincatsariventiriniri ishanincajeitaniri Israel:
- ² Icoasotaque iroametantero iotantsi jero oametantsi, iriotacaajeitantariri itsipapee ocantayetiri iotiri,
- ³ iriotantearori oametantsi, inquenqueshiretempa cameetsa, irantero cameetsatsiri, irineanate tampatica, aisati iraacameetsatante.
- ⁴ Irotaque iriotantearori evancaripee caari iotatsi, inquenqueshiretantanaqueari cameetsa.
- ⁵ Yora iotatsiri, quenqueshireachari, iquemisantiro icanteetiriri, aiqero iriotasanotanaqueri.
- ⁶ Irotaque iriotantearori yoametantiri iotasanotatsiri, aisati ocantayetiri irineane, ishiacaaventayetiri jero neantsipee manachari.
- ⁷ Ayotasanotanteari, ocameetsati ajivate ampincatsateri Tasorentsi; yora caari iotatsi te irineacameetsateroji iotantsi aisati oametantsi.

Yoametiri Salomón itomi.

- ⁸ Aviro notomi, pinquemisantero noametimpiri, aisati eiro pipeacotarotsi oametimpiri piniro.
- ⁹ Irotaque oameetsatempineri pisavicanteari cameetsa, oquempeta nenquetsi inenqueyetari aisati amatseerentsi.

- 10 Ariorica incoavetea antayetirori caari cameetsatatsi iramatavitempi,
¡notomi, eiro pishinetaritsi!
- 11 Incantempirica: “Pimpoque pincarajeitena;
tsame amataviteri caari ioveetatsi, avavaquerita iravisanaquerica.
- 12 Tsame ampeacaashitearita cameetsajeitatsiri antecatsireavaquerita;
anquempetacanteri camatsiri itijeetiri.
- 13 Impoiji ontimimotasanotee paitapeerica ashitaarantayeteari
¡aajaquero avancoqui acoshiyetaqueri!
- 14 Caate, pincarajeitena antero paitapeerica amayeteri;
impoijiquea ampaarantavacayea maaroni aayeteri.”
- 15 Notomi, ¡Eiro poiijatiritsi,
pinijantareeri, eiro pantirotsi irantayeteri!
- 16 Tempa icoashita irantashiyetearo caari cameetsatatsi aisati
iroantashiyetea.
- 17 Atsipetashitaro ariorica avashitiri tsimeeri ario irineaquero;
- 18 Yora atiripee irisati oashitanontaincha,
irashinoncanteari iroyeeteri.
- 19 Aitaque incantajeiteari yora caari cameetsajeitatsi,
incamimentero icoashiyetaniri.

Ora iotantsi ocoacairi evancaripee irojajeitero

- 20 Ora iotantsi, onijantiro oneane avotsipeequi iquenantapiniyeetari,
21 jero ashitacoropeequi nampitsi
aisati jaocarica yapatotapinijeitantari.
- 22 “¡Avirojei evancaripee caari iotiro cameetsatatsiri,
tseencantajeitatsiri, caari iojeitatsi!
¡Jaoca oncarate pincoye piojeite,
aisati picoasanoti pincantimatante,
aisati pitseencajeitero iotantsi?
- 23 Pinquemisantena noncantimentempiro caari cameetsatatsi,
aisati niotacaasanotempiro niotiri aisati noquenqueshiretiri.
- 24 Nocajemavetaquempi nocoacaavetaquempi, pimlocashitena,
iro cantaincha te pincoajeiteji pinquemisantena.
- 25 Irointi pitseencajeitaquero noamejeivetimpiri,
te pincoajeiteji noncantimentempiro pantayetiri.
- 26 ¡Ari noshirontaquea ariorica omapocaquempi
ompomerentsitimojeitempi!
¡Aitaque novashiventaaquempi, ariorica pintsaroasanojeitanaque,
27 ariorica omapocajeitaquempi pintsaroajeite aisati neantsiyetatsiri,
pinquenqueshireacotashiyetanaquea, aisati
poashiretasanojeitanaquea,
pinquempetearo antearo tampea apishoirincatsari tsoncantatsiri!

- 28 Impoiji paventajeivetanaquena,
iro cantaincha eiro naquimpitsi;
pincoajeivetajena, eiro pineajanatsi;
- 29 tempa, te pincoajeiteroji iotantsi,
te pincoajeiteji pimpincatsateri Tasorentsi.
- 30 Te pincoajeiteji pinquemisantero nocantajeivetimpiri,
aisati pitseencaquero nocantimentavetimpiro pantayetiri.
- 31 ¡Irotaque pashinoncaimentajeitantarori pantayetiri!
¡Ontimasanotanaque picoashiyetari!
- 32 Yora caari iojeitatsi ompeacaajeiteari, te irioteji;
aisati onsoncajeitajeri caari quenqueshireacha.
- 33 Irintiquea quemisantajeitenane, irisavicajeite cameetsa,
eiro itsaroacaajeitarotsi paitapeerica covencayetsiri.”

Cameetsatatsiri omatacantayetiri iotantsi

- 2 ¹Notomi, pinquemisantero noneane,
pinquenqueshiretero nocantacantiri.
- 2 Pinquemasanotero iotantsi,
aisati pinquenqueshiretero, piotantearori.
- 3 Pincoacotasannotenaro catsini iotantsi,
aisati pinquenqueshirempa cameetsa,
- 4 pincoasanotero pinquempetacantero picoacoatiri plata,
aisati pinatasanotachari manachari.
- 5 Impoiji piotasanotanaque pimpincatsateri Tasorentsi,
aisati piotasanotanaqueri jaoca icantari Tasorentsi.
- 6 Tempa iriotaque iotacantatsiri,
aisati quenqueshiretacantatsiri maaroni.
- 7 Yora Tasorentsi yamitacotiri aisati iticaacoventiri
savicatsiri cameetsa, caari timatsine irantane.
- 8 Yamenacoventiri antayetirori cameetsayetatsiri,
aisati iticaacoventiri quemisantasannotiriri.
- 9 Piotanaquero queariotatsiri aisati cameetsatatsiri,
impoiji pantayetero maaroni cameetsayetatsiri.
- 10 Ontimasanotanaque piotantari,
irotaque pineacameetsatantearori pioyetanaqueri.
- 11 Ora cameetsatatsiri jero quenqueshireantsi
oncanteani onticaacoventempi.
- 12 Irotaque quempoyeacoventempine, eiro pantantarotsi caari
cameetsatatsi,
aisati oipacaacoventempi, eiro yoashinoncantimpitsi atiripee
piatsajeitachari,
- 13 Yora jocajirori cameetsatatsiri,

- irointi yantashitanacaro caari cameetsatatsi,
 14 iveshireimentashitaro yoashinoncanti,
 aisati yantashiyetari caari ipashiventacaa,
 15 yantashiyetaro itseeyayeta,
 te incoyeji irantero queariotatsiri.
 16 Ora iotantsi irotaque jocaacoventempine tsinane ashinentsi,
 neanavetachari cameetsa, tseeyachari,
 17 joquiriri ojime aavetacari evancarotantapaacari,
 caari moncaratiro ocantavetariri Tasorentsi, quiso oavacayea.
 18 Ariorica poijatanaquero ovancoqui,
 oquempetaca poijataquero avotsi jatantachari caamanentsiqui,
 19 Yora queanaintsineri ovancoqui, eiro ipiajarotsi;
 eiro catsini isavicajitsi cameetsa.
 20 Pantayetero cameetsatatsiri,
 aisati pimatapinitero yantayetiri cameetsayetatsiri.
 21 Tempa yora savicatsiri cameetsa, caari timatsi irantane,
 incanteani irisavique quipatsiqui.
 22 Irintiquea caari cameetsatatsi jeri oacantantatsiri,
 irojoqueeteri; eiro isavicantarotsi.

Iriotacotantearori iotantsi

- 3** ¹Notomi, eiro pipeacotarotsi noametaquempiri,
 pinquenqueshiretasanotero nocantacantiri;
²irotaque paneanteari osamani,
 aisati pinquimoshiretasanote cameetsa.
³Eiro catsini pipeacotarotsi pinintanti aisati queariotasanotatsiri,
 quiso poyero, pinquenqueshiretero,
 pinquempetacantero nenquetsiqui.
⁴Irotaque irineacameetsatantempiri Tasorentsi,
 aisati iraacameetsatempi atiripee.
⁵Pishiretasanoteari Tasorentsi,
 eiro piquenqueshireashitarotsi piotiri.
⁶Pincantapiniteri Tasorentsi paitapeerica pantayeteri,
 irotaque matacayempirone cameetsatatsiri.
⁷Eiro pijitashitatsi avirori piotasanoti;
 pimpincatsateri Tasorentsi,
 pojocajero caari cameetsatatsi.
⁸¡Irotaque quempetarori aavintarontsi cameetsatatsiri,
 pishintsitantajeari pivatsapeequi!
⁹Pimpincatsateri Tasorentsi, pimpaaranteri timimoyetimpiri,
 aisati jivayetatsiri oitsoquiyeti pivanquirepee;
¹⁰aitaque ojaasanotanaquea piquempoyeantaroriqui,

- aisati pijantarori ovaja.
- 11 Notomi, eiro piquisoshiretitsi iroametempirica Tasorentsi,
aisati eiro pishemashireatsi iroashinoncayempirica.
- 12 Tempa yora Tasorentsi yoametiri inintiri,
iquempeta atiri yoametiri itomi inintasanotiri.
- 13 Inquimoshirete iotatsiri,
aisati quenqueshireachari cameetsa.
- 14 Tempa ocameetsatasanoti, anaacotiri plata,
aisati omatacaasanotanti cameetsatatsiri anaacotiri oro.
- 15 Ora iotantsi ocoasanota catsini, anaacotiro mapiquipee
pinatanoyevetachari.
¡Tecatsi quempetearone paitapeerica icoasanoyeevetari!
- 16 Ora iotantsi oneacantiro osamani aneantsi,
aisati ashitaarantacanta jero opincatsatacanti.
- 17 Ancoasanoterorica iotantsi, oimoshirencanti;
anquemisanterorica, irotaque asavicanteari cameetsa.
- 18 Ora iotantsi irotaque oaneajerine coasanotirori,
inquimoshirejeite quiso oaquerori.
- 19 Otimimotasanoi iotantari Tasorentsi aisati iquenqueshireantari,
imatantacarori yovetsicaquero inquite, quipatsi,
- 20 aisati inashitacantacarori incajare,
jero otimantanacari mencorijenca cajashiiteatsiri.
- 21 Notomi, pincanteani pincoyero cameetsatatsiri,
eiro pipeacotarotsi pinquenqueshiretasanotea cameetsa.
- 22 Irotaque oaneajempine pisavicanteari cameetsa,
oquempetacaro nenquetsiqui.
- 23 Jaocapeerica pijayeteri, tecatsi paamaquea,
eiro catsini pantiro caari cameetsatatsi.
- 24 Ariorica pimacore, eiro pitsaroitsi,
aisati pimaye cameetsa.
- 25 Eiro pitsaroacaarotsi covencatatsiri mapocantatsiri,
aisati oashinoncantsi pocashiterineri caari cameetsajeitatsi.
- 26 Iriotaque Tasorentsi matacayempine pishiretasanotanteariri aisati
jocaacoventempine,
eiro yamataviyeetantimpitsi.
- 27 Eiro catsini pitsaneapitsataritsi paitarica cocotempine
timimotimpiri,
ocameetsati pamitacoteri.
- 28 Eiro picantitsi: “Osaitequera namitacotempi”.
Pamitacotiteari intsipaite.
- 29 Eiro piquenqueshireatsi poashinoncayeri pishaninca
saviquimotimpiri, neacameetsatimpiri.

- 30 Te oncameetsate pantantashiyetea,
tecatsirica antanatempine.
- 31 Eiro piquisanementiriti yantayetiri caari cameetsatatsi,
aisati eiro pinquempetaritsi avirori.
- 32 Te irineacameetsateriji Tasorentsi ishanincepee caari
cameetsajeitatsi;
irintiquea inecameetsatiri cameetsajeitatsiri.
- 33 Yora Tasorentsi yoashinoncairi caari cameetsatatsi aisati icarajeitiri;
irintiquea cameetsatatsiri, itasoncacoventiri.
- 34 Ishirontimentari Tasorentsi yora shirontimentantachari;
irintiquea caari shemejeitatsi, icavintsairi.
- 35 Yora iotatsiri, inecameetsayeetiri aisati ipincatsayeetiri;
irintiquea caari iotatsi, irisati manintacantachane eiro
ipincatsayeetiri.

Incantiri iroijatasanotero cameetsatatsiri

- 4** ¹Notomipee, pinquemisantasanotero nocantajeitimpiri;
pinquenqueshiretasanojeitero piotasanotanteari,
pinquenqueshiretea cameetsa.
- ²Tempa noamejeitaquempi cameetsata,
eiro pipeacojeitajarotsi.
- ³Aitaque noquempetapaari narori nojananequitapaini,
ora ina onintasanotaquena;
- ⁴aitaque iquempetaquenari apa yoametaquena:
“Pinquenqueshiretasanotero noneane,
pimoncaratero nocantaquempiri, paneasanotanteari.
- ⁵Pincoasanotero iotantsi aisati pinquenqueshiretea cameetsa;
eiro pipeacotarotsi noametaquempiri.
- ⁶Pinintasanotero iotantsi, eiro pipeacotarotsi,
irotaque jocaacoventempineri.
- ⁷Eirotsita picoirotsi paitapeerica,
pincoasanotero iotantsi, aisati pinquenqueshiretea cameetsa.
- ⁸Pinintasanotero, irineacameetsatanteetempiri,
pincoasanotero, incantacoyeetantempiri cameetsa.
- ⁹¡Irotaque inquenqueshireacotanteetempiri,
pimoncarataquero piotasanoti!”
- ¹⁰Notomi, pinquemisantasanotero noneane,
pinquenqueshiretapinitero, irotaque pintimanteari osamani.
- ¹¹Niotacaasanotempiro iotantsi pintimanteari cameetsa,
aisati nomatacayempiro cameetsayetatsiri,
- ¹²eiroquea otimantatsi jocayempineri jaocapeerica pijayeteri,
aisati eiroquea pantantarotsi caari cameetsatatsi pavisantearori.

- 13 Pinquenqueshiretasanotero oametantsi, eiro pipeacotarotsi;
pimatasanotero, irotaque oaneajempineri.
- 14 Eiro poijatacotiritsi yantayetiri caari cameetsajeitatsi,
eiro piquempetaritsi avirori.
- 15 Paamaventeari, ariorica pineacoteeri, eiro pantirotsi,
pinijantareeri, irointi pimatero cameetsatsiri.
- 16 Eiro iquimoshiretitsi eirorica yantirotsi caari cameetsatsi;
aisati eiro imacoreimatitsi teorica irantacayeriji itsipapee.
- 17 Ora yantapinitiri yoashinoncaajeitiri itsipapee,
iquempetacantaquero yoari aisati irapinitiri.
- 18 Ora yantayetiri cameetsajeitatsiri, aiquero irijatatiye
irisavicasanojeite cameetsa,
iquempetacaro oquitaiteamani, irosati irishipaquireantapaaquea
catsirincaiteri.
- 19 Irointiquea yantayetiri caari cameetsajeitatsi,
te oncameetsateji aisati te iriotimateji paita yoashinoncaaqueri,
oquempetaca itimaque tsiteniriqui.
- 20 Notomi, pinquemisantaranotero noneane.
- 21 Eiro catsini pipeacotarotsi;
¡pinquenqueshiretasanotero!
- 22 Irotaque oaneajeiterineri maaroni coyeroneri
aisati intecatsijeitanteeri.
- 23 Paamaventacotasanotearo piquenqueshireantari,
anaacotiro timayetatsiri quipatsiqui;
tempa irotaque oaneajempineri,
- 24 Paamaventea pineaveeyetero paitarica pincantashiyeteeri;
pojocajero tseyantsi.
- 25 Pamenapinite tampatica, eiro poiyyotatsi.
- 26 Pinquenqueshiretero cameetsa panteri,
ari pimatapinitero cameetsayetatsiri.
- 27 Eiro pipeacotarotsi cameetsayetatsiri;
irointiquea paamaventeoro caari cameetsayetatsi.

Tsinane peacaariri shirampari

- 5 ¹ Notomi, pinquemisantero nocantimpiri nioyetiri aisati
noquenqueshireyetiri.
- ² Irotaque oametempine; eiro pantashitarotsi paitapeerica,
aisati pimatero pineanatanteoro cameetsa piotiri.
- ³ Tempa ora tsinane ashinentsi,
cameetsajenca oneanaveta, anaacotiri quejitsi;
- ⁴ iro cantaincha oshequi oashiretacanta,

anaacotiro quepishiyetatsiri aisati sataamentotsi tsampimenitatsiri apite.

- 5 Poijatanaquerorica, aanaquempi caamanentsiqui;
onquenacanaquempi anta itijeetiri camatsiri.
- 6 Te oncoyeji iotero jaoca oncateari anee osamani,
aisati te onquenqueshireacoteaji paita avishimoterone.
- 7 Irotaque notomi, nocantantimpiri: “Pinquemisantena;
eiro pipeacotarotsi noametaquempiri.”
- 8 Pinijantareero tsinane ashinentsi;
eiro catsini piquempejitarotsi ovancoqui,
- 9 eiroquea pipeantarotsi timimotimpiri pantaveeventiri,
pimpaquerorica tsinane pashinisato oashinoncantatsiri;
- 10 aisati eiro yaantajarotsi pashinisati timimoyetimpiri,
pipomerentsiventari pantaveeventiro.
- 11 Omoncarataquearica pincamanteari,
piracosanovetanaquearo, pineavaquearica intsiquero
ompeanaquea pishintsiti.
- 12 Aisati pincantavetanaquea:
“¡Paitaquea caari noquemisantantaro yoameyeevetanari!
¡Paitaquea notseencantacarori icantimenteevetanari!
- 13 Te noncoyeji nonquemisanteri oamejeitanari;
aisati te nonquemisanteroji yoamejeivetaquenari.
- 14 Irotaque meeca nopashiventasanotantacari,
ineaquena maaroni noshanincapee.”
- 15 Pinquimoshireventero pijina apaniro,
tempa irotaque pijinasanori.
- 16 Eiro pimanintiro pijinasanori, pinintasanotero;
Eiro pijatashitirotsi pashinisato, pinintantearori.
- 17 ¡Ora pijina irotaque pashisanori, tecatsi pashini pashiteari!
¡Eiro pishinetirotsi oneavintsateari pashinisati!
- 18 ¡Ocameetsati pinquimoshireventero pijinasanori;
tempa irotaque paaqueri pevancaritantapaacari;
- 19 Ocameetsataque maaroni, aisati onintimpi!
¡Oncanteani avitsanotempi aisati onintasanotempi!
- 20 Notomi, ¿paita pintsipatantearori tsinane ashinentsi?
¿Paita pishinetantearori avitsanotempi?
- 21 Iotasanotiro Tasorentsi yantayetiri atiripee,
tecatsi impeacotea aparoni yantayetiri.
- 22 Yora caari cameetsatatsi, irisati ashinoncaimentajearone yantayetiri,
oquempetaca ishiticaja.
- 23 Irotaque oamaajerine ipiatsatacaro;
icantimenteevetariri impeasanotajea.

Eiro ipinacovenantaritsi ireevitiri itsipapee.

- 6** ¹ Notomi, ariorica pincerteri pitsipatapinitari ireevitantatsiri aisati pashinisati,
 “Naro pinacovenantajempine.”
² Oca picantaqueriri, oquempetaca avisati ovashitajancha,
 aviro cantacayearone eirorica imatirotsi impinatajempi.
³ Eiro icantacantantimpitsi, jerocha panteri:
 eiro pishemetitsi, pijatashiteri
 pincantajeri impeacotajempiro picantavetacariri.
⁴ Eiro pisamanitiro, intsipaite povetsicajero cameetsa;
⁵ pinquempeteari maniro, ishiapitsatari oyerinemeru,
 aisati pinquempeteari tsimeeri arapitsatirori oashirentsi.

Icantiriri perantipee

- ⁶ Peranti, pijate pameneri sancori paita yantiri,
 piotanteari jaoca icanteetari;
⁷ tecatsi tiancavetearine,
 aisati tecatsi canterine paita iranteri,
⁸ iquempoyeanonta yoari osarentsiqui,
 omoncaratarica panquirentsi;
⁹ ¡Aitapaaque pimaataque, peranti!
 ¡Aitapaaque pinareashitaca!
¹⁰ Ainiroquera aasanotimpi pivochoquine,
 pitaapiniti, pisatevacota, pimaasanotantari;
¹¹ irotaintsi omapoquempi tsoncacotantsi,
 oquempetari quenaquenayetatsiri ivetsica irimanatanteari.

Jaoca icantari caari cameetsatatsi

- ¹² Yora caari cameetsatatsi aisati piatsatincari,
 icantani iquenaquenayeti yovaayetiro tseeayantsi.
¹³ Yamenampiojaquitavacaayeta, ishevashevatiro iitepee,
 aisati ijicotantayetaro iracotsapaqui;
¹⁴ te oncameetsateji iquenqueshireantari,
 icantani iquenqueshiretiro irantero caari cameetsatatsi
 aisati iquenayeti yantavacaashiyeta.
¹⁵ Irotaque intsoncantajeari intsipaite,
 tecatsi incantacotajea.

Jero caari ininti Tasorentsi

- ¹⁶ Ocarati 6, ariorica ⁷ iquisasanotiri Tasorentsi catsini:
¹⁷ yora jitacantashitachari ineaperota,

- neanatantarori tseyantsi,
 ovayetiriri atiri cameetsatatsiri,
 18 quenqueshiretirori irantero caari cameetsatatsi,
 shintsiventirori irantero caari cameetsatatsi,
 19 yora cantacotavacaashitachari aisati tseyari
 jeri intarori inquisacanteariri ishanincapee.

Ompomerentsitimoteari aimentarori ijina

- 20 Notomi, pincanteani pinquenqueshiretapinitero nocantimpiri aisati
 oametimpiri piniro.
 21 Pincanteani pinquenqueshiretero,
 onquempetea poisotacaro pitsanoqui.
 22 Irotaque oametempine jaocarica pijayeteri,
 onticaacoventempi pimayerica,
 aisati onquenqueshireacayempi pintinaamanajerica.
 23 Queario, ora icantacantiri aisati oametantsi oquempetacaro
 tsiorontsi tsiotachari;
 aisati icantimenteetimpirorica pantane
 jero yoameyeetimpiri oquempetacaro avotsi oaneantatsiri.
 24 Onticaacoventempi, eiro pishinetantarotsi tsinane caari
 cameetsatatsi,
 ora ashinentsi, cameetsavetachari oneanati.
 25 Pineerorica ocameetsavorotaque,
 eiro piquenqueshiretirotsi pantero,
 ¡aisati eiro pineveshinearotsi amenaquempirica!
 26 Ora antashiyetariri shirampari ocoi impinayeetero oanteari;
 irointiquea aimentariri ojime,
 antacaayetari shirampari oneacameetsatiri.
 27 Yora oanquetarori omenqui paamari inejiqui,
 ari ontaacotaqueri.
 28 Yora aatiquerone paamari, intaaquea iitiqui;
 29 aisati inquempetea anteroneri tsinane ashinentsi,
 eiro yavisacoti, ari irashinoncaimentaquareo.
 30 Yora coshinti ayeririca itashe,
 tecatsi cantimenterine yantaqueri;
 31 irompa ariorica irayeetaqueri, ontimatiye iroimpiajeneri
 icoshitaqueri,
 oncarate 7 impinatapinitajeri; aisati impajeri maaroni
 timimotiriri.
 32 ¡Te inquenqueshiretempa cameetsa
 yora antashiyetarori tsinane ashinentsi!
 ¡Yora antirori, irisati oashinoncaajancha!

- 33 Ontimatiye impasanayeeteri aisati incantimayeeteri,
tecatsi peacoteanarine yantaqueri.
- 34 Tempa yora shirampari tsanearori ijina, iquisasanota catsini;
eiro ipeacotarotsi incoanaquerica impiacoventajea.
- 35 Eiro icoitsi irayeri quireequi,
aisati eiro ipitsimareajatsi impashiyeevetearirica paitapeerica.

Oquenqueshireari tsinane aimentariri ojime

- 7** ¹ Notomi, pinquemisantero noneane,
pinquenqueshiretasanotero nocantacantiri.
- ² Pinquemisantero nocantacantiri aisati noametantiri,
pishentero, pinquempetacantero poqui picavintsauro, irotaque
paneasanotanteari.
- ³ Poisotacotearo pitsapaquiqui,
pincanteani pinquenqueshiretero.
- ⁴ Pincoasanotero iotantsi, pinquempetacantero pitsiro;
aisati quenqueshireantsi, pinquempetacantero pitsipavintsatari.
- ⁵ Irotaque jocaacoventempine
eiro amatavitantimpitsi tsinane aimentariri ojime,
aisati ashinentsi neanavetachari cameetsa.
- ⁶ Ari aparo quitaiteri nosaviqui novancoqui,
namenacoyeti omoroqui
- ⁷ noneaqueri evancaripee caari quenqueshireacha,
namenavaqueri aparoni caari quenqueshireasanotacha catsini.
- ⁸ Iquempejitantapaacarori osorinaqui avotsi, yavisanaque intatiquero,
irosati iquenantanaca ovancoqui ora tsinane.
- ⁹ Aitaque tsitenijencaiteanaji,
- ¹⁰ irosati osotoantanaca tsinane intsipaite,
ontonquiotantavaqueariri.
Oanenquimentanacaro antashiyetantariri shirampari,
- ¹¹ ocoashita irineveyeetearo,
te oncoyeji osavicasanote ovancoqui;
- ¹² irointi oquenaquenayeti nampitsiqui nianqui, aisati
osorinaquiyetapaaque,
oyeayetiri shirampari avisayetatsiri, aavaqueri.
- ¹³ Ari avitsanotavaqueri evancari, onintavorotaqueri,
amenasanotaqueri ivoroqui, ocantiri:
- ¹⁴ “Nocantitaca nontayeri novira aacameetsatavacanteari,
meca nomoncarataquero nocantaqueri.
- ¹⁵ Irotaque meeca nopocantacari noneavaquempi.
¡Oshequi nocoiteasanotaquempi, meecaquea noneajimpi!
- ¹⁶ Anta nomainta noameetsatanaquero nomaamento,

- cameetsamaotasannotatsiri poneachari Egiptoqui;
 17 nosaitantayetaro casancajayetatsiri,
 mirra, áloe jero metaqui.
 18 Tsame anintavacayea aisati aneavintsatavacayea,
 irosati onquitaiteantanajea.
 19 Tempa yora nojime te irisavique, ijati iquivanti,
 20 yaanaque oshequi quireequi;
 eiro ipoquitajatsi irosati isoquijantapaajea cashiri.”
 21 Ari iquemisantaquero ocantayetaqueriri,
 oameetsantaqueri onevetacantacariri.
 22 Irosati yojatantanacaro,
 iquempetacari vaca yayeetiri iroanteeteariri
 aisati maniro aavaqueri oashirentsi,
 23 impoji inquenteeteri irasancanequi chacopiqui;
 aisati iquempetacari tsimeeri airi charija;
 te irioteji ari incamaque.
 24 Irotaque nocantantimpiri notomi, pinquemisantena,
 pinquemisantero noametimpiri.
 25 Eiro catsini piquenqueshiretirotsi
 pijatashitero tsinane, opeacampicari.
 26 Tempa oshequi oamaajeitaqueri antayetirori,
 aisati oshequi catsini oashinoncacantaqueri.
 27 Ariorica pojatanaquero ovancoqui;
 oquempetaca pijataque caamanentsiqui.

Ocoacantiri iotantsi

- 8** ¹ Ora iotantsi ocajemasanoti catsini,
 aisati quenqueshireantsi onijantiro oneane.
² Otimi jenoqui toncaariqui aisati nianqui avotsiqui,
³ aitaque iquemeetirori iqueantapiniyeetaroriqui nampitsi:
⁴ “Avirojei atiri, noquenquetsatacairi.
⁵ Evancaripee, caari iotatsi aisati caari quenqueshireacha,
 ¡pincoasanote pinquenqueshiretea,
 aisati piotero cameetsatatsiri!
⁶ Pinquemisantavaquero noncantempiri
 cameetsatasanotatsiri aisati queariotasanotatsiri.
⁷ Ora noncanteri, queario oni;
 te noncoye noneanatero tseeyantsi.
⁸ Maaroni nocantiri ocameetsatasanoti;
 te aneimateroji amatavitantsi.
⁹ Yora quenqueshireachari aisati iotatsiri
 oconijatimotiri noneane aisati ocameetsatimotiri.

- 10 Picoavetari plata aisati oro ioshitachari,
Pincoasanojeitero irointi oametantsi aisati iotantsi.”
- 11 Ocameetsatasanoti irointi iotantsi,
anaacotiro mapiquipee pinatasanoyevetachari;
tecatsi quempetearone.
- 12 “Naro iotantsi, nocaratiro quenqueshiretantsi,
niotiro noametantiro cameetsatasanotantsi.
- 13 Ampincatsateririca Tasorentsi, aquisaquero caari cameetsayetatsi.
Noquisaquero shemetantsi, ora jitacantashitantsi,
aisati caari cameetsatatsi jero amatavitantsi.
- 14 Naro quenqueshiretirori nantayetiri aisati nomatasanotiro;
narotaque ashitarori quenqueshireantsi cameetsa, aisati
shintsitantsi.
- 15 Naro matacairiri pincatsariyetatsiri aisati
jivatacantayetatsiri incantacoventanti cameetsa.
- 16 Naro matacairiri pincatsariyetatsiri ipincatsariventanti
aisati incantacoventanti, cameetsa jivatacantatsiri.
- 17 Nonintiri maaroni nintanari
aisati coasanotatsiri irineena, aitaque irineaquena.
- 18 Naro ashitaarantacantachari aisati nopincatsatacanti,
ineacameetsatavacanteetari aisati cameetsa isavicanteetari.
- 19 Ora nopantiri ocameetsatasanoti catsini,
anaacotiri oro aisati plata ioshitanovetachari.
- 20 Nosaviqui cameetsa aisati otampaticati nantayetiri
- 21 Yora nintanari nompaaanteri iriori,
ojaasanotanaquea ivancoqui cameetsayetatsiri.
- 22 Narotaque intacari yovetsicaquena Tasorentsi,
tequeratani irintearo maaroni,
yovetsiquitaquena tequerani irovetsiquero quipatsi.
- 24 Itimacaitaquena tequerani ontimeni antearo incajarepee
aisati nijapee jero sotoaajayetanaintsiri.
- 25 Tequeratani irovetsiquero otishipee aisati toncaaripee,
itimacaitaquena Tasorentsi;
aisati tequerani yovetsiqueroni quipatsi,
aisati shiocayetatsiri jero quipatsitanaintsiri.
- 27 Noneaquero iquisotacaaquero inquitequi
oquempetaca osavicultacaro antearoite incajare.
- 28 Yovetsicantacarori mencoripee inquitequiniri,
aisati yoaquero incajare saanajatatsiri,
- 29 icantantacarori jaoca ovecarayeteari,
eiro oquenaajatashiyetantanacatsi,
aisati yoantacarori quisotacairori quipatsi.

- 30 Nocantani quiso noaqueri, aisati nocantani noimoshirenquiri,
aisati ineaquena noneatsatimentaro maaroni quitaiteripee.
- 31 Noneatsatimentacaro maaroni yovetsicaqueri,
aisati noquimoshireventaqueri atiri.
- 32 Notomipee, meeca pinquemisantena;
nocol pinquempetena avirori, irotaque pinquimoshirejeitanteari.
- 33 Pinquemisantajeitero camantantsi,
eiro picantajeititsi: ‘Te noncoyeroji iotantsi.’
- 34 Inquimoshirete quemisantenaneri,
incanteani iramaventempa maaroni quitaiteripeequi,
impcapiniterica novancoqui.
- 35 Yora iotajenaneri, aitaque irineaquero aneantsi,
aisati irineacameetsateri Tasorentsi;
- 36 iro cantaincha yora nijantareanajenaneri, irineero covencayetatsiri,
¡Yora quisanari, inintaquero caamanentsi!”

Ocoacantiri iotantsi aisati caari onintacanti

- 9 ¹Ora iotantsi ovetsicaquero ovanco,
oatiaque otincampee ocarataque 7, oanencayetaquero.
- 2 Ari oaque virantsipee oajeiteari, cameetsa ovetsicayetaqueri,
aisati oameetsajataquero ovaja, oameetsayetaquero meesa.
- 3 Irosati otiancantacaro onampirepee toncaariqui nampitsiquiniri,
oncajemayete:
- 4 “¡Pimpocajeitanaque aca evancaripee caari iojeitatsi!”
Aisati ocajemacantaqueri caari quenqueshireacha, ocanti:
- 5 “Pimpocajeite poajeitearo novetsicaqueri oanarontsi,
aisati pirajeitero noameetsajataqueri ovaja.
- 6 Pinquenqueshireajea pisavicantajeari cameetsa,
pinquempejeitajeari atiri quenqueshireajeitachari cameetsa.”
- 7 Poamevetearirica cantimatantatsiri,
ari intseencanaquempi aisati inquisanentanaquempi.
- 8 Pinquenquejaavetearirica cantimatantatsiri, ari inquisanaquempi;
irintiquea iotatsiri poameteririca, ari irineacameetsataquempi.
- 9 Piotacaasanoteririca iotatsiri, iriotasanotantanaqueari.
Poametasanoteririca atiri cameetsatsiri,
iriotasanotantanaqueari.
- 10 Ayotasanotanteari, ocameetsati ajivate ampincatsateri Tasorentsi;
ayoteririca Tasorentsi cameetsatasanotatsiri, ari
ontimimotanaquee quenqueshireantsi.
- 11 Ocameetsatasanotaque iotantsi,
irotaque oaneajeitempine osamani.
- 12 Avirorica iotatsiri, pisavique cameetsa;

- irompa avirorica cantimatantatsiri, avisati cantacayearone.
 13 Yora caari iotatsi iquempetacaro tsinane
 ovaayetirori neantsipee caari queariotatsi.
 14 Osaviqui savicamentotsiqui oqueantapinitaroriqui ovanco
 anta toncaariquiqui nampitsiquiniri,
 15 ocajemayetiri avisayetatsiri antayetirori cameetsatsiri:
 16 “¡Pimpocajeitanaque aca evancaripee caari iojeitatsi!”
 Aisati ocajemacantaqueri caari quenqueshireacha:
 17 “Ora nija icoshiyeetiri ocameetsajatasanotaque;
 aisati tanta yoyeetari imanacayeetari, oposhinitasanoti.”
 18 Iro cantaincha te irioteji, yora queaintsiri ovancoqui,
 ari ijajeitaqueri otiminta caamanentsi.

Icamantantajiro Salomón iotantsi

- 10** ¹Jero icantayetiri Salomón:
 Yora evancari iotatsiri yoimoshirenquiri iriri jero iriniri;
 irintiquea caari iotatsi, yoashinoncairi.
²Ora ashiyeveteari ancoshitanterorica, eiro oveshireacaasanoteetsi;
 irointiquea antapiniyeterorica cameetsayetatsiri, ojocacoventee
 caamanentsi.
³Yora Tasorentsi eiro ishinetiritsi intasheaveete cameetsatsiri;
 irintiquea caari cameetsatsi, inquemapinitero itashe.
⁴Pantaveeterica capichaji, oncoiteimotempi paitapeerica;
 irompa pantaveetasanoterica, ontimotasanotempi pashiyeteari.
⁵Yora aviitatsiri osarentsiqui, iriotaque iojeitatsiri;
 irintiquea peraventarori iraviite, irinti caari iojeitatsi.
⁶Yora atiri cameetsatsiri itasoncacoventeetiri;
 irintiquea caari cameetsatsi,
 ontsonqueri oashinoncantsi.
⁷Yora cameetsatsiri inquenqueshireacoyeeteri cameetsa;
 irintiquea caari cameetsajeitatsi, intsipaite impeacoyeeteari.
⁸Yora iotatsiri iquemisantiro icanteetiriri;
 irintiquea neanatashitarori caari ioti, irashinoncayea.
⁹Yora caari ireevitantatsi tecatsi intsaroacayea;
 irintiquea antayetirori caari cameetsatsi, irashinoncayea.
¹⁰Yora amenampioquijayetantatsiri, iriotaque amanontarori caari cameetsatsi
 aisati neaveetashiyetarori paitapeerica, irashinoncayea.
¹¹Ora ineanayetiri cameetsatsiri, irotaque oaneantatsiri;
 irintiquea caari cameetsatsi, ontsonqueri oashinoncantsi.
¹²Ariorica pinquisavacayea, irotaque pantavacanteari;
 irompa pinintavacayearica, pimpeacotavacayearo
 icantimayetimpiri.

- 13 Yora iotatsiri ineaveeti cameetsa;
irintiquea caari quenqueshireacha, impasayeeteri itapiiqui.
- 14 Yora iotatsiri ioti imajereti, te irineaveetashiteaji;
ariorica irineaveetashitea caari iotatsi, ompomerentsitimoteari
incovencatacote.
- 15 Ora yashiyetari ashitaarantincari, irotaque jocaacoventiriri;
irintiquea caari ashitaarantacha, yashinoncaa.
- 16 Ora irineajeiteri cameetsatatsiri iraneasanojeite;
irintiquea caari cameetsajeitatsi, irosati irantapinitero caari
cameetsatatsi.
- 17 Yora quemisanterone icanteetiriri, osamani iraneajeite;
irintiquea caari quemisanterone, impeajeitea incamajeite.
- 18 Irashi yora tseyajeitachari imaniro iquisashireta,
aisati yashi yoiro caari iotatsi, yovaayetiro neantsiyetatsiri.
- 19 Yora neaveetashitachari oshequi icomita;
irintiquea iotirori irimajerete, iotasanojeiti.
- 20 Ora irineane cameetsatatsiri oquempetacari plata ioshitachari;
iointiquea iquenqueshireyevetari caari cameetsatatsi, tecatsi
ojitaquea.
- 21 Ora ineanatiri cameetsatatsiri oshequi iotacaajeitanti;
irintiquea caari iotatsi, incamimentero caari iquenqueshiretacoti.
- 22 Intasoncaventantearica Tasorentsi, oshequi ontimimotee ashiyeteari,
aisati te oashiretacanteaji.
- 23 Yora caari quenqueshireacha iquimoshireventiro yantayetiri caari
ipashiventacaa;
irintiquea iotatsiri, iquimoshireventiro iotantsi.
- 24 Ora itsaroacaajeitari caari cameetsatatsi, irotaque avishimojeiterine;
irintiquea cameetsatatsiri, irimoncarayeeteneri icoajeitiri.
- 25 Impeajea caari cameetsatatsi ariorica omapocaqueri covencatatsiri
quempetarori antearo tampea;
irintiquea cameetsatatsiri, incanteani intime.
- 26 Yora tianquiriri peranti irantaveete,
onquempetimoteari quepishitatsiri caari imayetiro
irantsiqueetero,
aisati onteajaquiteri cachaa.
- 27 Ampincatsateririca Tasorentsi osamani aneajeite;
irintiquea caari cameetsajeitatsi, eiro itimitsi osamani.
- 28 Yora cameetsatatsiri inquimoshireventero coajica yoyeajeitaqueri;
irintiquea caari cameetsatatsi, irineero irashinoncaajeitea.
- 29 Irojacaacoventeri Tasorentsi antayeterone cameetsatatsiri;
irintiquea impoyereajeite antayetirori caari cameetsatatsi.
- 30 Eiro catsini ipeatsi cameetsajeitatsiri;

irintiquea caari cameetsatatsi, eiro icantani intime quipatsiqui.

31 Yora cameetsatatsiri ineaveetantaro iotantsi;

irintiquea tseyachari, iroimajerenteeteri.

32 Yora cameetsatatsiri ineanayetiro cameetsayetatsiri;

irintiquea caari cameetsatatsi, ineanatashiyetaro tseyyantsi.

11

¹Te irineacameetsateri Tasorensi amatavitantashiyetarori moncaramentotsi;

irintiquea inecameetsati moncarayetantarori cameetsa.

2 Yora shemetatsiri, tecatsi pincatsaterine;

irintiquea caari shemetatsi, otimimotiri iotantsi.

3 Yora cameetsatatsiri oametiri tampaticatatsiri iotiri;

irintiquea amatavitantatsiri, opeacaari yamatavitantayeti.

4 Ora ashivevetari, eiro omatirotsi ojocaacoventante

ariorica omoncarataquea incantacoventetee;

irointiquea cameetsatatsiri antaqueeri

ojocaacoventeero caamanentsi.

5 Ora tampaticatatsiri oameetsatiri yantayetiri cameetsatatsiri;

irintiquea caari cameetsatatsi, irisati ashinoncaimentajearone yantayetiri.

6 Ora tampaticatatsiri ojocaacoventiri atiripee cameetsayetatsiri;

irintiquea aacantantashiyetachari oashinoncairi, inevetashiyetari.

7 Ariorica incamaque caari cameetsatatsi,

aitaque impeasanoteari aisati iroori icoashiyetaniri.

8 Yojocaacoventeri Tasorensi cameetsatatsiri

ompomerentsitimovetearirica;

irintiquea caari cameetsatatsi, ipinaajiniri

ompomerentsitimotanajeari.

9 Ora irineanepee caari cameetsatatsi onsoncacantajeiteri icarajeitiri;

irointiquea iquenqueshiretasanotiri cameetsatatsiri,

oavisaacotacantanti.

10 Intimajeiterica cameetsa cameetsajeitatsiri, inquimoshirejeite iriori inampiquiniri.

Ariorica incamajeite caari cameetsatatsi, inquimoshirejeite.

11 Ora imayetiri cameetsajeitatsiri osavicacaajeitiri cameetsa

ishanincapee;

irointiquea ineanayetiri caari cameetsajeitatsi, otsoncacantanti.

12 Yora caari quenqueshireacha icantimatiri itsipatapinivetari;

irintiquea quenqueshireachari, imajereti.

13 Yora ovaayetirori neantsipee te irimaneroji;

irintiquea iotatsiri, imaniro iquemayevetari.

14 Teerica impincatsariventante cameetsa pincatsari,

oshequi ompomerentsitimoteari atiripee;

- iranaacotante cameetsa intimerica oshequi amitacoyetiriri.
- 15 Ompomerentsitimoteari pinacoventiriri pashinisati;
irintiquea caari coatsi impinacoventante, irisavique cameetsa.
- 16 Ora tsinane cameetsatatsiri impincatsayeetero;
irintiquea shirampari neaperotachari, irashitaarantea.
- 17 Yora cavintsantatsiri icavintsaja irisati;
irintiquea oashinoncantatsiri, yoashinoncaaja irisati.
- 18 Yora caari cameetsatatsi ipinayeevetari oshequi, iro cantaincha
yatsipetashitaro;
irintiquea antapinitirori cameetsayetatsiri, oqueariotaque
impinayeeteri.
- 19 Yora antayetirori cameetsayetatsiri iraneasanotaje;
irintiquea antayetirori caari cameetsatatsi, incamajeite.
- 20 Iquisaqueri catsini Tasorensi quenqueshiretashiyetarori caari
cameetsatatsi;
irintiquea caari timatsi irantane, iquimoshireventiri.
- 21 Queario, eiro ineashiyetaritsi antayetirori caari cameetsatatsi,
aitaque iroasanqueetaqueri;
irintiquea cameetsayetatsiri, irojocaacoventeeteri.
- 22 Ora tsinane cameetsavorovetachari caari iotatsi,
oquempetacari chancho yoyeetiniri ishintaquiqui aniiyo
yovetsiqueetiri oro.
- 23 Ora icoasanotiri cameetsajeitatsiri, incanteani irantayetero
cameetsa;
irointiquea yantayetiri caari cameetsajeitatsi, oshequi
oquisacantanti.
- 24 Ainiro atiri pimantashiyetachari, aiqero oshequiasanotanaqueri
timimotiriri;
irintiquea mashitsatatsiri, intsoncacotasantea incoiteavete.
- 25 Yora pashitantachari ontimimotasanoteri irashiyeteari;
aitaque incanteari, aisati impeetajeri iriori.
- 26 Yora manapitsaterine ishaninca tirico yoamaimatiri atiri;
irintiquea pimantenerine, irineacameetsayeeteri.
- 27 Yora antapinitirori cameetsayetatsiri icoi irineacameetsayeeteri;
irintiquea antapinitirori caari cameetsatatsi, oshequi
ompomerentsitimoteari.
- 28 Yora shiretashitarori timimoyetiriri intsoncajea, inquempetearo
camashitatsiri oshi;
irintiquea cameetsatatsiri, inquempetearo inchato
shiocajempequiyetatsi.
- 29 Yora caari amenerine cameetsa ivancoquiniri, tecatsi timimoterine;
yora caari iotatsi incanteani iromperanateari iotatsiri.

- 30 Yora savicatsiri cameetsa yaneasanoti osamani;
irintiquea caari cameetsatatsi, eiro osamanititsi iranee.
- 31 Ariorica itasoncacoventeetiri cameetsatatsiri aca quipatsiqui;
tempa iroasanquetaasaanoyeeteri iriori antayetirori caari
cameetsayetatsi.

- 12** ¹ Yora nintirori iroametasanoyeeteri inintiro iriotasanote;
irintiquea caari coyerone incantimenteeteri yantiri, eiro iotitsi.
- ² Yora Tasorentsi inecameetsatiri cameetsajeitatsiri;
irintiquea quenqueshiretirori caari cameetsatatsi, yoasanquetairi.
- ³ Ora yantayetiri atiri caari cameetsajeitatsi, eiro osavicacantitsi
cameetsa;
iointiquea yantayetiri cameetsatatsiri, osavicacanti cameetsa
oncanteani.
- ⁴ Ora tsinane antayetirori cameetsatatsiri opincatsacantiri ojime;
iointiquea caari cameetsatatsi, oashinoncacantasanotiri.
- ⁵ Yora cameetsatatsiri iquenqueshiretapinitiro cameetsayetatsiri;
irintiquea caari cameetsatatsi, irointi iquenqueshiretapiniti
iramatavitante.
- ⁶ Ora irineane caari cameetsatatsi, irointi amatavitantsi oamantatsiri;
iointiquea irineane cameetsatatsiri, oavisaacotanti.
- ⁷ Yora caari cameetsajeitatsi incamaquerica, intsoncajeitea;
irintiquea irishanincajeitajeari cameetsajeitatsiri, incanteani
intime.
- ⁸ Irineacameetsayeeteri iotatsiri;
irintiquea caari iotatsi, intseencanayeeteri.
- ⁹ Ocameetsati eiro inecameetsayeteetsi, iro cantaincha itimi
amitacoyeeteeri,
anaacotiro impincatsayeevetee, iro cantaincha eiro avatsi
cameetsa.
- ¹⁰ Yora cameetsatatsiri iquenqueshireacotapinitiri ivirapee;
irintiquea caari cameetsajeitatsi, te irintacojeiteariji.
- ¹¹ Yora antaveetirori iroane otimimotasanotiri yoari;
yora caari quenqueshireacha yantashiyetaro paitapeerica.
- ¹² Ora icoashiyetari caari cameetsajeitatsi, irotaque peacaariri;
iointiquea yaayetiri cameetsatatsiri, osavicacanti cameetsa
osamani.
- ¹³ Yora caari cameetsatatsi yashinoncaimentaro irisati itseeashiyetari;
irintiquea cameetsajeitatsiri, tecatsi oashinoncayerine.
- ¹⁴ Aparopeeni avishimoteri paitarica, ineanataqueri aisati yantaqueri,
- ¹⁵ Yora caari iotatsi ijitacantashita cameetsataque maaroni yantayetiri;
irintiquea iotatsiri, iquemisantiro icanteetiriri.
- ¹⁶ Yora caari iotatsi intsipaite itsimaa;

- irintiquea quenqueshireachari, ipeacotaro icantimayeevetari.
 17 Yora cameetsatatsiri icamantacotiro queariotatsiri;
 irintiquea caari cameetsatatsi, icamantacotashitaro tseyantsi.
 18 Ainiro neanatarori caari cameetsatatsi oashinoncanti;
 irointiquea ineanatiri iotatsiri, oveshireacanta.
 19 Yora neanatorori queariotatsiri incantaitatitempani intime;
 irintiquea tseyaripee, eiro itimasanotitsi.
 20 Ora iquenqueshiretiri caari cameetsajeitatsi irantayeteri, irointi
 iramatavitante;
 irointiquea yoametantiri aacameetsatantatsiri, oveshireacanta.
 21 Yora cameetsajeitatsiri eiro catsini avishimoyetiritsi
 pomerentsitimotearine;
 irintiquea caari cameetsajeitatsi, oashinoncaajeiteri.
 22 Yora Tasorentsi iquisaqueri amatavijeitantatsiri;
 irintiquea antayetirori queariotatsiri, iquimoshireventiri.
 23 Yora quenqueshireachari te irishemetimenteroji iotiri;
 irintiquea caari iotatsi, ishemetimintiro yantashiyetari.
 24 Yora antaveetatsiri cameetsa irimatasanotero irijivatacante;
 irintiquea peranti, imperanayeetari.
 25 Ora oashiretantsi, oquenqueshireacaari atiri;
 ora neantsi cameetsatatsiri, oquimoshiretacari.
 26 Yora cameetsatatsiri yoameteri ishaninca;
 irintiquea caari cameetsajeitatsi, te irioteji intime cameetsa.
 27 Yora peranti inquenayevetea, eiro yamitsi poshinirintsi;
 irintiquea antaveetatsiri, otimimotasanotiri yashiyetari.
 28 Anteriorica cameetsayetatsiri ari oaneasanojeitaquee;
 irompa eirorica aquenqueshiretatsi cameetsa, aitaque ajataque
 caamanentsiqui.

- 13** ¹Yora evancari iotatsiri iquemisantiro yoameteriri iriri;
 irintiquea piatsatariri, te inquemisanteri icantimentavetariri.
²Aparopeeni avishimoteri paitarica ineanataqueri;
 irintiquea aacantantayetatsiri, icoasanotiro iroashinoncante.
³Yora aamaventacotarori irineaveete, yaamaventacotaja irisati;
 irintiquea neanatashiyetachari oshequi, irisati oashinoncaajancha.
⁴Yora peranti icoasanoyevetaroro paitapeerica, iro cantaincha tecatsi
 iraye;
 irintiquea antaveetasanotatsiri, otimimotasanotiri paitapeerica.
⁵Yora cameetsatatsiri te incoyeroji tseyantsi;
 irintiquea caari cameetsatatsi, iroashiventayeeteri aisati eiro
 ipincatsayeetiri.
⁶Ora cameetsatatsiri ojocaacoventiri caari timatsine irantane;
 irointiquea yantayetiri caari cameetsajeitatsi, ontsoncanceri.

- 7 Ainiro caari otimimoti paitapeerica, iro cantaincha
iquempetacantashitaca ashitaarantincari;
ainiro aisati otimimotasanovetari, iquempetacantashitaca
coiteavetatsiri.
- 8 Ora irovaararo ashitaarantincari ojocaacoventiri, eiro yoanteetaritsi;
irintiquea caari otimimoti, tecatsi coatsine iroyeeteri.
- 9 Yora cameetsajeitatsiri iquempetacari tsiorontsi quitasantetatsiri;
irintiquea caari cameetsajeitatsi, iquempetacari tsiorontsi
tsivacatsiri.
- 10 Yora shemetatsiri iriotaque intacantarori yantanti;
irintiquea caari shemejeitatsi, otimimotiri iotantsi.
- 11 Ora ovaararontsipee yaashiyeetari intsipte, onsoncaarantea;
irintiquea apatotirori intsiquero, oshequitasanoti.
- 12 Ora acoasanoeyevetari caari moncaratacha, oashiretacanta;
iointiquea moncaratachari acoiri, oquempetacaro inchato
oaneantatsiri.
- 13 Yora caari quemisanterone icanteevetariri, iroashiretimentearo;
irintiquea antirori icanteetiriri, impinayeeteri.
- 14 Ora yoametantiri iotatsiri, oaneanti,
aisati ojocaacoventantiro caamanentsi.
- 15 Yora quenqueshiretachari cameetsa ineacameetsajeitiri itsipapee;
irintiquea aacantantashiyetachari, irashinoncaajeitea.
- 16 Yora quenqueshireachari yonijantiro cameetsa iotasanoti;
irintiquea caari iotatsi, ishementimentiro yantashiyetari.
- 17 Yora camantantatsiri caari cameetsatatsi yamayetiro
cantantsiyetatsiri;
irintiquea camantantatsiri cameetsa, yoimoshirencanti.
- 18 Yora tseenquirori oametantsi incoiteaveeyete, aisati eiro
ipincatsayeetiri;
irintiquea quemisantirori yoameyeetiriri, impincatsayeeteri.
- 19 Ora moncaratachari icoasanoeyetiri, oimoshirencanti;
yora caari iotatsi te incoye irojoquero caari cameetsatatsi.
- 20 Pincarateri iojeitatsiri, piotanaque avirori;
irompa pincarateririca caari iojeitatsi, impeacayempi.
- 21 Yora antajeitirori caari cameetsatatsi oijanajeitiri covencatatsiri;
irintiquea cameetsajeitatsiri, irineero cameetsatatsiri.
- 22 Ora yashiyetari cameetsatatsiri, irojocanaqueneri icharinepee;
irintiquea antirori caari cameetsatatsi, ipioyevetaro ovaararontsi,
irajero impoji cameetsatatsiri.
- 23 Anta iroanequi coiteaveetatsiri otimasanoti ivanquirepee;
iro cantaincha oshequi amparatanaquea, eirorica yantirotsi
cameetsayetatsiri.

24 Yora caari oameterine itomi, te irininteriji;
irintiquea nintasanotiriri, yoametiri.

25 Yora cameetsatatsiri iquemaro yoari, te intasheeji;
irintiquea caari cameetsatatsi, aasanotiri itashe.

14 ¹Ora tsinane iotatsiri osavicacaajeitiri cameetsa otomipee;
iointiquea caari iotatsi, opeacaajeitiri.

²Yora savicatsiri cameetsa ipincatsatiri Tasorentsi;
irintiquea caari savicatsi cameetsa, itseenquiri.

³Ora icantashiyetari caari iotatsi irointi ishemeti;
iointiquea icantayetiri iotatsiri, ojocaacoventiri.

⁴Teerica intime vaca quiavaneterone quipatsi, eiro otimitsi tirico;
irompa intimerica, aitaque ontimasanotaque.

⁵Yora camantacotirori queariotasanotatsiri, te intseeeyaji;
irintiquea camantacotashitarori caari cameetsatatsi, itseeeya.

⁶Yora cantimatantatsiri icoaveta iriote, iro cantaincha eiro imatirotsi;
irintiquea quenqueshireachari, te ompomerentsitimoteariji
iriotasanote.

⁷Pinijantareajeiteri caari iotatsi;
tempa ora icantayetiri, eiro iotacaimpitsi.

⁸Ora iotantsi iotacaasanotiri cameetsatatsiri jaoca icantari;
irintiquea caari iotatsi, yamatavitaja irisati.

⁹Yora caari iojeitatsi ishirontimentajeitaro yantashiyetiri;
irintiquea cameetsajeitatsiri, yaacameetsatavacaajeita.

¹⁰Iojeitiro aparopeeni oashiretacairi,
aisati te iriotacayeri pashinisati iquimoshiretirica.

¹¹Intsoncajeitea ishanincasanoripee yora caari cameetsajeitatsi;
irintiquea ishanincasanoripee cameetsajeitatsiri, incanteani
irisavique cameetsa.

¹²Ainiro yantayetiri atiri cameetsatimovetariri,
iro cantaincha omoncaratapaaquearica, aitaque
incamimentaquero.

¹³Ishirontavetarica atiri, irosati icanta yoashireta,
inquimoshirevetea, imoji irirayea.

¹⁴Yora caari iotatsi iquimoshireventavetaro yantashiyetari;
yora cameetsatatsiri iquimoshireventiro imayetiri.

¹⁵Yora caari quenqueshireacha ishiretaro maaroni icanteeyetiriri;
irintiquea quenqueshireachari cameetsa, ioti paita iranteri.

¹⁶Yora iotatsiri itsaroacaaro caari cameetsatatsi, te irantero;
irintiquea caari iotatsi, te inquenqueshireacoteroji paitapeerica.

¹⁷Yora quishitatsari shintsini yantantashita, te
inquenqueshiretimateaji;
irintiquea quenqueshireachari, yaamaventaro iranteri.

- 18 Yora caari quenqueshirejeitacha yashinoncaimentaro yantashiyetari;
irintiquea quenqueshirejeitachari, iotasanoti.
- 19 Yora caari cameetsajeitatsi coajica impincatsateri cameetsajeitatsiri,
aisati incoacojeiteri iramitacoteri.
- 20 Yora coiteaveeyetatsiri iquishiri itsipatapinivetari;
irintiquea ashitaarantincari, itimasanoyeti oshequi
tsipavintsatariri.
- 21 Yora tseenquiriri itsipavintsatari yantaquero caari cameetsatatsi;
jinquimoshirete yora cavintsairiri coiteaveeyetatsiri!
- 22 Yora coirori irantero caari cameetsayetatsi, impeashjeitea;
irintiquea coasanotatsiri, irantero cameetsayetatsiri,
incanteani irininteeteri aisati iracameetsayeeteri.
- 23 Yora shintsiventirori yantaveeti timatsi iroyeari;
irintiquea neaveetashitachari, tecatsi timimoterine.
- 24 Yora iotatsiri irimatero inquenqueshiretasanotanjea;
irintiquea caari iotatsi, aiqero ijatati eiro iotanjea.
- 25 Yora camantacotantatsiri cameetsa yoavisaacotacantiri itsipa, eiro
yoanteetaritsi;
irintiquea camantacotantashitachari tseyari, yoacantanti.
- 26 Yora pincatsatiriri Tasorentsi, iticaacoventiri,
aisati eiro yashinoncaatsi itomipee.
- 27 Yora pincatsatiriri Tasorentsi iraneasanojeite;
yojocaacoventiri, eiro icamantatsi.
- 28 Yora pincatsariventiriri oshequi ishanincapee,
impincatsatasanoyeeteri;
irintiquea pincatsariventiriri caari oshequitatsi, eiro imatirotsi
irojocaacoventea irisati.
- 29 Yora caari shemantacha yonijantiro timatsi iotantari;
irintiquea shemantachari, yonijantiro te irioteji.
- 30 Yora caari quenqueshiretiro paitapeerica, irisavique cameetsa,
intecatite;
irintiquea quisanentantatsiri, irimantsiate irosati itonquipeequi.
- 31 Yora oashinoncairiri coiteaveeyetatsiri te impincatsatiri
Vetsicaqueriri;
irintiquea yora cavintsairiri, ipincatsatiri.
- 32 Yora caari cameetsatatsi oashinoncairi yantashiyetari;
irintiquea cameetsatatsiri, ojocaacoventiri yantayetiri.
- 33 Ora iotantsi otimimotiri yora quenqueshiretirori cameetsa;
irintiquea caari iojeitatsiri, te irioteji.
- 34 Ora cameetsatatsiri, irotaque iquimoshireventiri savicayetatsiri
nampitsipeequi.
Irointiquea caari cameetsatatsi, oashiventaajeitiri.

³⁵ Yora pincatsari ineacameetsatiri inampire iotasanotatsiri;
irintiquea caari iotatsi, iquisacaari.

15 ¹ Yora neanatatsiri cameetsa yoimajerentiro tsimajencantsi;
irintiquea shintsitirori ineanati, iquisacaasanotari itsipa.

² Ariorica ineanati iotatsiri, iotacanti;
irintiquea caari iotatsi, ineaveetashiyeta.

³ Yora Tasorensi itsoteiro maaroni,
yamenacoventiri cameetsajeitatsiri aisati caari cameetsajeitatsi.

⁴ Yora neanatatsiri cameetsa yoimoshirencanti, iquempetacaro inchato
oaneantatsiri;
irintiquea neanatirori caari cameetsatatsi, yoashiretacanti.

⁵ Yora caari iotatsi itseenquiro yoamevetariri iriri;
irintiquea quemisantirori, yonijantiro iotasanoti.

⁶ Yora shirampari cameetsatatsiri otimimotasanotiri ivancoqui
yashiyetari;
irintiquea caari cameetsatatsi, yatsipetashitaro yaayevetari.

⁷ Yora iotatsiri yoameyetantiro cameetsayetatsiri iotiri;
irintiquea caari iotatsi, oshequi icomita; tecatsi iriote.

⁸ Yora Tasorensi te irineacameetsatero ipashiyevetariri caari
cameetsatatsi;
irintiquea cameetsatatsiri, ineacameetsatiro iquenquetsatacairiri.

⁹ Yora Tasorensi te irineacameetsatero yantayetiri caari
cameetsatatsi;
irintiquea savicatsiri cameetsa, inintasanotiri.

¹⁰ Yora jocajeroneri cameetsatatsiri, yoasanquetasanoyeetiri;
aisati caari coatsi incantimenteeteri yantaqueri, incame.

¹¹ Ineasanotiri Tasorensi camajeitatsiri jaoca intijeari,
jaisati iotasanotaquero iquenqueshirejeitiri aneajeitatsiri!

¹² Yora cantimatantatsiri te irininteriji cantimentavetariri yantayetiri,
aisati te incoyeji incarajeiteri iotatsiri.

¹³ Yora quimoshiretatsiri aisati oashiretachari
ioyeetiri jaoca icantavorotari.

¹⁴ Yora quenqueshireachari icoasanoti iriote;
irintiquea caari iotatsi, iquenqueshiretiro yantashiyetari.

¹⁵ Yora oashiretachari, ompomerentsitimoteari maaroni
quitaiteripeequi;
irintiquea quimoshiretatsiri, incanteani iroveshireajeitea.

¹⁶ Ocameetsati eiro ashitaarantatsi, irointi ampincatsateri Tasorensi,
anaacotiro ashitaarantavetearica, irointi antime ashinoncayea.

¹⁷ Ocameetsati ayearo panquirensi shiocayetatsiri aisati
anintavacaajeitea;
anaacotiro ayearirica ivatsa vaca anquisavacaimentajeiteari.

- 18 Yora quishitatsari shintsini, iriotaque poneacantarori yantavacaa;
irintiquea caari shintsitatsi irishemempa, yoimajerentiri antavacaachari.
- 19 Yora peranti oshequi irineero pomerentsitimotearine,
oquempetaca iquenaque totseequimashiqui;
irintiquea cameetsatatsiri, tecatsi pomerentsitimotearine,
oquempetaca iquenaquero avotsi cameetsatatsiri.
- 20 Yora jananequi iotatsiri iquimoshiretacairi iriri;
irintiquea caari iotatsi, itseenquiro iriniro.
- 21 Yora caari quenqueshireacha iquimoshireventiro yantashiyetari;
irintiquea quenqueshireachari yoameta irisati jaoca incanteari
irisavique cameetsa.
- 22 Teerica pinquenquetsatavacayeaji cameetsa, eiro pimatirotsi
piquenqueshireyvetari;
ariorica pinquenquetsatavacaajeitea maaroni, ari pimataquero.
- 23 ¡Oveshireacanta incamanteeterica cameetsa,
ocameetsatasanoti incamanteete intsipaite!
- 24 Yora iotatsiri iquenantaro avotsi oaneantatsiri,
aisati ojacaacoventiri eiro ijatantatsi caamanentsiqui.
- 25 Yora Tasorentsi intsoncajeri ishanincapee shemetatsiri;
iroidintiquea camajimentaaro, intasoncaventenero ashitasanotari.
- 26 Yora Tasorentsi te irineacameetsatero iquenqueshiretiri caari
cameetsajeitatsi;
iroidintiquea ineacameetsati neantsi cameetsatatsiri.
- 27 Yora nevetarori yashiyetari itsipa, iroashinoncaacantajeiteri ivancoquiniripee;
irintiquea caari aantari ishaninca quirequi, osamani intime.
- 28 Yora cameetsatatsiri iquenqueshiretiro cameetsa paita incanteri;
irintiquea caari cameetsatatsi, ineaveetashiyetaro caari cameetsatatsi.
- 29 Yora Tasorentsi injantareiri caari cameetsajeitatsi;
irintiquea cameetsatatsiri iquemisantiro iquenquetsatacairiri.
- 30 Yora quimoshiretatsiri yoimoshirencanti,
aisati ora camantantsi cameetsatatsiri, oimoshirencanti.
- 31 Yora quemisantirori icantimenteetiriri oaneeri,
incarajeiteri iotatsiri.
- 32 Yora caari coyerone iroameyeeteri, te irintacoteaji irisati;
irintiquea quemisantirori incantimenteeteriri yantayetiri,
iriotasanotanaque.
- 33 Ampincatsateririca Tasorentsi, iriotacaasanotee;
aisati ancoyerica impincatsayeete, ocameetsati eiro ashemetitsi.

Icantasanotiri: “Eiro yantantarotsi caari cameetsatatsi”

16 ¹Timatsi iquenqueshireyetiri atiri iranteri,
iro cantaincha irio Tasorentsi cantasanotatsiri.

- 2 Yora atiri ocameetsatimotiri maaroni yantayetiri,
iro cantaincha irio Tasorentsi cantatsiri
ocameetsatirica icoayetiri, irompa terica.
- 3 Pincanteri Tasorentsi iramitacotempi paitapeerica pantayeteri,
impoiiquea aitaque pimataquero.
- 4 Yovetsicantacarori Tasorentsi maaroni paitapeerica timatsi
icoaqueri,
aisati iroasanquetanteariri coajica caari cameetsatatsi.
- 5 Yora Tasorentsi te iramaveteriji shemetatsiri,
aitaque iroasanquetaaqueri.
- 6 Yora nintasanotiriri, peacotiniri itsipapee yantimotaqueri;
yora pincatsatiriri Tasorentsi, eiro antirotsi caari cameetsatatsi.
- 7 Ariorica ineacameetsatiro Tasorentsi yantayetiri atiri,
ari incantacaashireajeari quisajeivetariri iraacameetsatantajeariri.
- 8 Ocameetsati antaveetasanote cameetsa impinayeevetee capichaji;
irompa impinatanoyeevetee, irointi iramataviyeete.
- 9 Yora atiri irio quenqueshireyeterone irantayeteri,
irioquea Tasorentsi matakayerine.
- 10 Yora pincatsari ineanatiro yoametiriri Tasorentsi,
irotaque caari yoashinoncaashitantari atiri
- 11 Icoaque Tasorentsi cameetsa irimoncaratanteetearo tenayetatsiri
aisati tsantsayetatsiri;
tempa iriotaque nintacantirori otimantacari.
- 12 Yora pincatsaripee te incoyeroji caari cameetsatatsi yantashiyeetari;
tempa cameetsa icantacoventanti.
- 13 Yora pincatsari ineacameetsatiri jaanicarica neanatatsiri cameetsa.
- 14 Yora pincatsari iquisasanotarica, yoacantanti;
irintiquea iotatsiri, icoaque incatsimareacaajeari.
- 15 Inquimoshireterica pincatsari, irisavicacantajeite cameetsa;
ariorica incavintsaante, iquempetacaro mencori opariantari incani.
- 16 Ocameetsati ancoasanotero iotantsi aisati quenqueshireantsi;
anaacotiri oro aisati plata.
- 17 Yora cameetsatatsiri te iranteroji caari cameetsatatsi;
yora aamaacoventarori yantiri irisati aamaacoventacha.
- 18 Yora shemetatsiri irisati oashinoncaacantajanchane;
aisati jitacantavetachari iranaacotante, tecatsi irimate.
- 19 Ocameetsati ancarateri coiteaveeyetatsiri,
ashitaarantavetearica irointi ancarateri shemejeitatsiri.
- 20 Yora amenacantirori cameetsa yashiyetari, cameetsa irisavique.
¡Inquimoshirete shiretariri Tasorentsi!
- 21 Yora quenqueshiretirori cameetsa irantayeteri, icanteetiri
quenqueshiretincari;

ora neantsipee cameetsatatsiri oshiretacanti cameetsa.

22 Anquenqueshiretemparica cameetsa, antimajeite cameetsa;
avamevetearirica caari iotatsi, ari antsipetashitaquearo.

23 Yora quenqueshireasanotachari iotiro paita icantiri,
ora irineanepee oshiretacanti cameetsa.

24 Ora neantsipee cameetsatatsiri oquempetacaro ija pitsi;
oimoshirencantasanoti aisati oshintsishireacanti.

25 Ainiro yantayetiri atiri cameetsatimovetariri,
iro cantaincha omoncaratapaaquearica, aitaque
incamimentaquero.

26 Ora tashentsi antaveetacantasanoti ontimanteari, oanaronsi.

27 Yora caari cameetsatatsi iquenqueshiretiro irantero caari
cameetsatatsi,

ora ineaveeyetiri, oquempetacaro paamari tsoncantatsiri.

28 Yora caari cameetsatatsi iriotaque poneacantarori yantavaca;
aisati oayetirori tseeyantsi, iquisacaayetari itsipapee.

29 Yora caari neashitantacha yamatavitiri itsipavintsatari,
irotaque yantacantariri caari cameetsatatsi.

30 Yora coatsiri irantero caari cameetsatatsi, yamenampiojaquitavaca,
ariorica yantaquero, yatsicatseratimentaro.

31 Yora pajetanaintsiri ocameetsati impincatsayeeteri;
tempa isavicaque cameetsa.

32 Ocameetsatasanoti eiro ashemashireatsi, anaacotiro
aneaperovetearica.

Ocameetsati aamaventacotea arosati, anaacotiro ampincatsariventer
itsipapee.

33 Yora atiri ipishonquimentiro paitarica, iriotanteari jaoca incanteari,
iro cantaincha irio Tasorensi cantacanteroneri maaroni.

17 ¹Ocameetsati ayearo caari poshinitatsi asavicanteari cameetsa;
anaacotiro avajeiveteari poshiniri, irointi antavacaajeitea.

² Yora nampirensi iotatsiri irijivatacayeri piatsatachari itomi
nampitariri;
incarajeiteri itomipee nampitariri, iraayetajero icashiacaairiri.

³ Yora oro aisati plata itayeetiri paamariqui, irioperotantari;
irintiquea Tasorensi ineantaro iquenqueshireantari atiri.

⁴ Yora caari cameetsatatsi aisati tseeyari
iquemisantashiyetaro ineanatashiyetari icarajeitiri.

⁵ Yora cantanatiriri coiteaveetatsiri, itseencaqueri Vetsiquiriri;
aisati quimoshiretatsiri irineeririca irashinoncayea, aitaque
iroasanquetaimentaqueri.

⁶ Yora anteashiparipee iquimoshireventiri icharinepee,
yora jananequipee iquimoshireventiri ashitariri.

- 7 Yora caari iotatsi te incoyeji irineanate cameetsa,
aisati jivatacantatsiri, te incoyeji irineanatero tseeyantsi.
- 8 Yora pinacoventantatsiri iroashinoncaacantanteariri itsipa,
ijitashiveta irimatero paitapeerica icoashiyetari.
- 9 Yora peacotantariri ishaninca icantimavetari, ari iracameetsatajeri;
irintiquea piatariri, irinijantareanaqueri itsipavintsatari.
- 10 Ariorica irishintsitsayeeteri iotatsiri, iriotasanotanaque;
irintiquea caari iotatsi impasanatapiniyeevetari, eiro
iquenqueshireatsi.
- 11 Yora piatsatachari irointi icoaque irantantayete;
iro cantaincha intianqueeteneri oashinoncantatsiri.
- 12 Oncameetsateme anquempjitearo meeni yaapitsayeetirorica orijani;
yanaacotiro aneayeri caari iotatsi yantashiyetaro paitapeerica.
- 13 Eiro catsini ojoquiritsi oashinoncantsi
yora quishiriri ishaninca aacameetsavetariri,
- 14 Yora antavacaachari eiro yoipacajirotsi, iquempetacaro quimoja
oshintsijati;
ocameetsati pinijantareeri, eiro pantavacaashitantatsi.
- 15 Ocarati apite caari yamaveti Tasorentsi:
impeacoyeeteanaririca antaquerori caari cameetsatatsi;
irio itsipa, iroashinoncaashiteari caari antavetaro.
- 16 ¿Paita ipocantari caari iotatsi yamiri iireequite iramanantantearori
iotantsi,
teerica aneero iquenqueshiretantari?
- 17 Yora nintasanotiriri itsipavintsatari,
ariorica ompomerentsitimovetari, incanteani iramitacoteri;
inquempetacanteri irirenti.
- 18 Yora caari quenqueshireacha coatsiri impinacoventeri itsipavintsare;
irisati cantacayearone ompomerentsitimoteari.
- 19 Yora coatsiri incantimatante icoasanoti irantavacayea;
aisati neaveetashitachari shemetatsiri, irisati
oashinoncaacantajanchane.
- 20 Yora quenqueshireashiyetarori caari cameetsatatsi, eiro catsini
isaviquitsi cameetsa;
aisati neanatoriri tseeyantsi, oshequi irashinoncaayea.
- 21 Ariorica iririntee caari iotatsi, oshequi iroashiretacayee;
eiro iquimoshiretacayeetsi.
- 22 Ariorica anquimoshirete, antecatsijeite;
irompa ariorica avashiretea, ompeanaquea ashintsiti.
- 23 Yora caari cameetsatatsi imanacaari quireequi
iroashinoncaacantanteariri ishaninca;
eiro icantacoventantajaritsi cameetsa.

- 24 Ora iotantsi irotaque icoiri quenqueshireachari;
irintiquea caari iotatsi, te ontimimoteriji iramenantearori icoiri.
- 25 Yora evancari caari iotatsi iquisacaari iriri aisati iriniro,
yoashiretacaari.
- 26 Te oncameetsateji ancoacotashiteari impinate caari antayeevetaro
paitapeerica,
aisati eiro apasatashitaritsi savicatsiri cameetsa.
- 27 Yora iojeitatsiri te irineaveetasanote;
aisati quenqueshirejeitachari, imajereti.
- 28 Yora caari iotatsi iquempevetari iotatsiri aisati quenqueshireachari,
ariorica imajereti.
- 18** ¹Yora quenqueshireacotachari irisati, icoanontaro irashiteari,
aisati te inquemisantantero maaroni cameetsatsiri
icanteevetariri.
- 2 Yora caari iotatsi te incoyeji iriote;
iointi iquempevetacanta ioyeti.
- 3 Ora caari cameetsatsi oashiventanti;
aisati shemetantsi, eiro opincatsatacanteetsi.
- 4 Ora irineane iotatsiri iotacanti,
oquempetacaró nija saanajatatsiri sotoaajatatsiri.
- 5 Yora cantacoventantajeitatsiri te oncameetsateji irintacotashiteari
cantacaarori,
aisati eiro icantiritsi caari anterone: “Eiro namitacotimpitsi.”
- 6 Yora caari iotatsi irineanatanakerica, iriotaque poneacantarori
yantavaca;
ora icantashiyetari, irisati oashinoncaacantachane.
- 7 Ora ineaveetashiyetari caari iotatsi, irisati
oashinoncaacantajanchane,
oquempetaca ishiticatsanotaca irisati.
- 8 Ora cantacotantsipee oquempevetacaró chochoqui,
oshequi icoasanoheetiro iriniyeetero.
- 9 Yora perantipee aisati tsoncaarantantayetatsiri
ishanincatavacaajeitaca.
- 10 Yora Tasorentsi iquempetacaró pancotsi quisotasanoatsiri,
yaventajeitari yora cameetsajeitatsiri, irojacaacoventanteariri.
- 11 Yora ashitaarantincari ishiretashivetacaró irovaararo ari
ojacaacoventaqueri,
iquempetacantaquero nampitsi timatsiri antearoite otanto.
- 12 Yora shemetatsiri irisati oashinoncaacantajanchane;
yora caari shemetatsi, irisavique cameetsa.
- 13 Yora acashitachari tequera inquemisantasanotero icanteetiriri,
te irioteji aisati impashiventea.

- 14 Ora veshireantsi otecatsitacotiri mantsiatatsiri;
iro cantaincha yoashiretarica, tecatsi materoni intecatsitacayeri.
- 15 Yora iotatsiri aisati quenqueshireachari
iriotasanotanaquero paitarica icoasanotiri.
- 16 Ariorica ampashitantea, iracameetsajeitee ashanincapee aisati
pincatsariyetatsiri.
- 17 Yora jivatatsiri ineaveeti yojocaacoventa, iquempetacantashitaca
ocameetsataque icantaqueri;
iro cantaincha impocapaaquerica itsipa camantacoterine,
irioyeetanaqueri itseyaca.
- 18 Ariorica incantacoventante Tasorentsi,
iroimajerenteri antavacaajeitachari, irovetsicajeneri maaroni.
- 19 Opomerentsita irovetsicajeri iquisacaacari ishaninca;
anaacotiro nampitsi tantotacotachari,
aisati antavacaachari, eiro yaacameetsatavacaajatsi,
iquempetacaro onijantayeti tantotsi.
- 20 Aparopeeni irineero covencatatsiri,
irosati aashireantanaqueari paitarica ineanataqueri.
- 21 Ora aneanayetiri cameetsatatsiri oaneanti,
ariorica aneanatero caari cameetsatatsi, oamanti;
yora neaveetashitachari oshequi irashinoncaimentearo icantiri.
- 22 Ayerica ajina, aaquero cameetsatatsiri;
irotaque yonijaaqueeri Tasorentsi inintaquee.
- 23 Yora coiteaveeyetatsiri icoacotanti,
yora ashitaarantincari te iracameetsateri, irointi iquisatsatiri.
- 24 Ainiro tsipatavacavetachari intsipaite inquisanajeri;
iro cantaincha timatsi quearioventirori itsipavintsatavacaa,
iquempetacantaqueri irirentisanori.
- 19** ¹Ocameetsatasanoti eiro ashitaarantatsi irointiquea
ancameetsate,
anaacoteri caari iotatsi aisati cantimatantatsiri.
- ² Te oncameetsateji antashitearo intsipaite paitapeerica, teerica
anquenqueshiretasanoteaji;
ariorica ashintsiventero ari ancomitaquearo.
- ³ Yora caari iotatsi eiro isaviquitsi cameetsa,
impoiji incante: “Irio Tasorentsi cantacaacarori.”
- ⁴ Yora ashitaarantincari oshequi nintasanoyetiriri;
irintiquea coiteaveetatsiri, eiro icaratajiritsi aacameetsavetariri.
- ⁵ Yora camantacotashitarori tseyantsi, aitaque
iroashinonqueetaqueri;
aisati tseyari, eiro ineashiyeetaritsi.
- ⁶ Yora pashitantachari aisati caari mashitsatatsiri,

- oshequi icoacoayeetiri intsipavintsayeeteari.
- 7 Yora caari ashitaarantacha te incoajeiteriji irirentipee;
aisati iriori itsipavintsavetaniri, eiro icarajeitajiritsi.
- 8 Yora iotatsiri ineantaro iotaqueri,
irisati nintajancha aisati isaviqui cameetsa.
- 9 Yora camantacotashitarori tseeyantsi, aitaque
iroashinonqueetaqueri;
yora tseeyari oyeaqueri caamanentsi.
- 10 Te oncameetsateji inquempetacoteari caari iotatsi ashitaarantincari;
aisati peranaronsi impincatsariventero irioperoyetatsiri.
- 11 Yora quenqueshireachari cameetsa, yamavetiro inquishea,
aisati yora cameetsatsiri, te inquemisantero icantimayevetari,
- 12 Ariorica iquisa pincatsari, inquempetacari antearite maniti
amoroatsiri;
irompa iracameetsatantearica, inquempetacaro cajashiiteatsiri
saveshiqui.
- 13 Yora caari iotatsi yoashiretacaari iriri;
ora tsinane quishincaro oquempetacaro ovitejantapinitari nija.
- 14 Ora pancotsi aisati ovaararonsi irotaque ipeeri ashiteari;
iointiquea ijina quenqueshireachari, irio Tasorensi paqueriri.
- 15 Ora perantsi oimaasanotanti catsini,
yora peranti irineero intasheajeite.
- 16 Yora moncaratirori icantacantiri Tasorensi, incanteani iranee;
irintiquea tseequirori oametantsi, incame.
- 17 Pimpashitearirica coiteaveetatsiri, oquempetaca irio pipaqueri
Tasorensi,
iriotaque aisati oipiajempirone.
- 18 Poametasanoteri pitomi ainiroquera ijananequiti,
iro cantaincha paamaventea poamairicari, ariorica pimpasateri.
- 19 Yora tsimaasanotachari, ario iroashinonqueetaqueri;
eirorica yoashinonqueetiritsi, aikuero irijatatiye
inquisasanotanaquea.
- 20 Pinquemisantero icanteetimpiri, aisati pincoasanotero
yoameyeetimpiri;
aitaque piotasanotanaque.
- 21 Yora atiri oshequi iquenqueshirea paitapeerica irantayeteri;
iro cantaincha apatiro irantero icoacaacari Tasorensi.
- 22 Ora icoacayeetiriri atiri, incavintsaante,
aisati ocameetsati ancoiteaveeyevetea, iointiquea eiro
amatavitantitsi.
- 23 Ariorica ampincatsateri Tasorensi,
ario aneanaje anquimoshirete,

aisati eiro aquemaatsicatarotsi paitapeerica.

- 24 Yora peranti yajiricavetaro yoantari,
iro cantaincha eiro imatirotsi iroanquero iraco ivantequi.
- 25 Ariorica iroashinonqueeteri cantimatantatsiri, ari iriotanaje iriori
caari quenqueshireacha;
irintiquea iotatsiri, aparo iroameyeetaqueri, iriotanaque.
- 26 Yora oashinoncairiri iriri aisati tiancanatirori iriniro,
oshequi ipashiventacotacari ashitariri,
aisati yantimotaqueri caari cameetsatatsi.
- 27 Notomi, eirorica piquemisantirotsi nocantimentimpiri,
pimpeacotanaquearo icanteevetimpiri cameetsatatsiri.
- 28 Yora camantacotashitarori tseeeyantsi itseenquiro cameetsatatsiri;
yora caari cameetsatatsi ineanatantaro caari cameetsatatsi.
- 29 Vetsicaca inchaquii irineeri piatsajeitachari;
aisati iriori caari iojeitatsi, impasayeeteri itapiiqui.

20 ¹ Yora irirori ovaja cachojatatsiri, incantimatantashiyetanaquea,
aisati irirori shintsijayetatsiri, irineaveetashiyetanaquea;
irishinquitanaquearica irantashitanaquearo paitapeerica caari
cameetsayetatsi.

- 2 Ariorica iquisa pincatsari iquempetacari anteariite maniti
amoroatsiri;
jaanicarica quisacayearine incovencatacote.
- 3 Ineacameetsayeetiri atiri caari neaveetiri itsipapee;
irintiquea caari iotatsi, intacantaro ineaveetavacaa.
- 4 Ariorica omoncaravetea osarentsiqui yantaveetanteetari, eiro
yantaveetitsi peranti;
ariorica omoncaravetapempa yaviitanteetarori oitsoqui,
incoayevetanaquea, tecatsi iraye.
- 5 Ora iquenqueshireyetiri atiri imaniri, oquempetacaro quianarentsi
saanajatatsiri;
irintiquea yora quenqueshiretachari, iotacotasannotiro.
- 6 Ainiro quempetacantajeitachari moncaratirori icantiri,
iro cantaincha te aneroji ashiretacoteari.
- 7 Inquimoshirejeite itomipee neaqueriri ashitariri
isaviqui cameetsa.
- 8 Ariorica icantacoventanti pincatsari,
intsipaite iotiro jaanica antirori caari cameetsatatsi.
- 9 Tecatsi cantatsine:
“Nocameetsashiretasanoti nainti, tecatsi nantane.”
- 10 Jero caari icoi Tasorentsi yamataviteetarori:
ora imoncaratanteetarori tenayetatsiri
jero imoncaratanteetari tsantsayetatsiri,

- 11 Yora evancari iriotanteeteariri icameetsati,
irantayeterorica cameetsayetatsiri.
- 12 Yora Tasorentsi yovetsicaquero ayempita anquemanteari, aisati aqui
amenanteari.
- 13 Eiro pimaasanotitsi, picoiteaveeticari;
ocameetsati pantaveete ontimanteari poyeari.
- 14 Yora amanantatsiri icanti: “¡Te oncameetsateji ipimanteetiri!”
Iro cantaincha iramanantaquerorica, oshequi iroveshireimentearo.
- 15 Ocameetsati catsini ineantatiri iotasanotatsiri,
yanaacotiri maaroni oro aisati mapiquipee pinatasanoeyvetachari
timayetatsiri.
- 16 Yora coatsiri impinacoventeri pashinisati,
ocameetsati iraiteri iriori iitsaare, irosati impinatantajeariri
irevetiriri.
- 17 Yora atiri oshequi inetararo tseeyantsipee, oquempetomotiri
poshinitatsiri;
iro cantaincha coajica oquempetaca yoacaro quipatsi.
- 18 Paitarica anquenqueshireteri anteriori, ajivate
anquenquetsatacavaaajeitea;
iquempeta manatachari iquenquetsatacavaaajeita iriotanteari
irimanajeitea.
- 19 Yora ovayetirori neantsi te irioteji irimanagero iquemayetiri;
eiro picarajeitiritsi.
- 20 Yora oamaimatiriri iriri aisati iriniro,
incame onquempetimoteari tsitenishaatsiri.
- 21 Ora aayeveteari caari pomerentsitacha,
coajica eiro oveshireacaasanoteetsi.
- 22 Eiro picantitsi: “Nompiacoventajeata”;
irointi pishireteari Tasorentsi iranaacotacayempi.
- 23 Te irineacameetsateroji Tasorentsi tenayetatsiri
imoncaratanteyevetari;
ora caari imoncaratantayeeta cameetsa, te incoyeroji.
- 24 Yora Tasorentsi iotacairi atiri jaoca incanteari;
tecatsi ioterone jaoca incanteari coajica.
- 25 Ocovencati incashicaaveteari atiri Tasorentsi paitapeerica,
impoji iroashiniajero, eiro ipajiritsi icashiacaavetariri.
- 26 Yora pincatsari iotatsiri yojoquiri caari cameetsajeitatsi,
iroashinoncaacantasanoteri catsini.
- 27 Yora Tasorentsi ipaqueri atiri ishire;
irotaque oquempetacararo tsiorontsi tsiotacotiriri maaroni
iquenqueshireantariqui.
- 28 Yora pincatsari icantani impincatsariventante,

- intacojeitari ishanincapee aisati icantacoventiri cameetsa,
 29 Yora evancaripee ineaperotimentaro ishintsiyeti;
 ipincatsayeetantariri anteashiparipee, impajeitanaquerica.
 30 Yora caari cameetsatatsiri, impasayeeteririca,
 irotaque inquenqueshireanteari cameetsa.

21

- ¹Yora Tasorentsi iotacairi pincatsari icoacairiri irantayeteri;
 iquempetiro iquenaajatacairo nijapee.
 2 Yora atiripee ijitacantashiyetaro ocameetsati maaroni yantayetiri;
 iro cantaincha irio Tasorentsi cantatsiri ocameetsatirica icoayetiri,
 irompa teerica.
 3 Icoasanoti Tasorentsi antayetero cameetsayetatsiri;
 anaacotiri virantsi itaapiniyeevetari.
 4 Yora caari cameetsajeitatsi ishemei aisati ijitacantashita iotasanoti,
 irointi iquenqueshiretaque caari cameetsatatsi.
 5 Ora iquenqueshireasanoyetiri cameetsa iranteri, aitaque
 irimataquero;
 irointiquea yantashiyetari intsipaite, oshequi oncomitimoteari.
 6 Ora ovaararontsi yaashiyetari itseeayoventeetari, intsipaite
 otsonquita;
 irotaque incamimentantearori coirori.
 7 Yora caari cameetsajeitatsi irosati tsoncacantajeitajerine
 yoashinoncantayeti;
 tempa te incoyeji irantero cameetsayetatsiri.
 8 Yora caari cameetsatatsi te irisavique cameetsa, irointi
 yamatavitanti;
 irintiquea cameetsatatsiri, ocameetsatasanotaque yantayetiri.
 9 Ocameetsati intime atiri otataroqui pancotsi apaniro,
 anaacotiro intimantearo antearoite pancotsi irisavicacantearori
 tsinane quishincaro
 10 Yora caari cameetsajeitatsi irointi iquenqueshiretiro irantero caari
 cameetsayetatsi;
 eiro catsini ineacameetsatimatiritsi icarajeitiri.
 11 Ariorica iroashinonqueeteri cantimatantatsiri, ari iriotanaje iriori
 caari quenqueshireacha;
 irintiquea iotatsiri, aparo iroameyeetaqueri, iriotanaque.
 12 Yora Tasorentsi cameetsatasanotatsiri, iotacotiri caari
 cameetsajeitatsi jaoca icanta isavicajeiti;
 ishinecoventiri intsoncajeiteri.
 13 Yora caari intacotearine coiteaveeyetatsiri paitarica incoacoveteariri,
 aisati iriori, eiro intacoyetaritsi incoavetearica iramitacoyeeteri.
 14 Yora quenqueshireachari impashitantea cameetsa,
 icatsimareacaari quisasanovetachari.

- 15 Ariorica incantacoventante cameetsa, yora cameetsatatsiri
inquimoshiretasanote;
irintiquea antayetirori caari cameetsatatsi, irashinoncaajeitea.
- 16 Yora caari antiro yantayetiri quenqueshireachari,
irijate itiminta camatsiri.
- 17 Yora coasanotirori inquimoshiretashitea
irirero cachojayetatsiri aisati intiriyetearo casancajayetatsiri,
intsoncacotasanoitea; tecatsi timimotajerine.
- 18 Yora amatavitantatsiri aisati caari cameetsatatsi
iroashinonqueeteri, impinayempari cameetsajeitatsiri.
- 19 Ocameetsatasanoti antime caaraiteriqui apaniro,
eiro acaratantarotsi tsinane quishincaro.
- 20 Anta ivancoqui iotatsiri otimimotasanotiri ovaararonsi aisati
casancajaripee;
irintiquea caari iotatsi, itsoncasanotiro maaroni timimotiriri.
- 21 Yora coasanotatsiri incameetsashirete aisati incavintsaante,
iraneasanojeite aisati impincatsayeeteri.
- 22 Ariorica yora iotatsiri irimanateri nampitsi ticaacovetasanotachari,
irimatero intsoncasanotiri paitapeerica yaventajeivetari.
- 23 Yora aamaventacotachari paitarica incanteri,
eiro opomerentsitimotaritsi.
- 24 Yora antashiyetarori paitapeerica, ipajiyetiri shemetatsiri,
tseencantatsiri aisati piatsatachari.
- 25 Yora peranti oamayeri icoayevetari;
tempa te incoyeji irantaveete.
- 26 Icantani maaroni quitaiteriqui icoashiveeta;
irintiquea cameetsatatsiri ipashitanta, te irimashitsateji.
- 27 Yora Tasorensi te incoyeroji ipashiyevetariri caari cameetsajeitatsi;
tempa iquenqueshiretiro irantero caari cameetsatatsi.
- 28 Yora camantacotashitarori tseyantsi, intsoncasanoyeetajeri;
irintiquea quemisantasanotirori icanteetiriri, incanteani iranque
cameetsa.
- 29 Yora caari cameetsajeitatsi iquempetacantashitaro ioyetiro yantiri;
irintiquea cameetsatatsiri, iotasanotiro yantayetiri.
- 30 Yora Tasorensi tecatsi cameetsatimoterine ioyevetari atiri,
aisati iquenqueshireyevetari cameetsavetachari.
- 31 Yora manatincari yovetsiquiri iyavaayotepee irijatanteari
irimanatea,
iro cantaincha irio Tasorensi matakayerine iranaacotante.
- 22** ¹ Iro cameetsatasanotatsiri irineacameetsatasanoyeetee
antimerica cameetsa,
anaacotiri intimimotasanoyevetee oro jeri plata.

- 2 Yora ashitaarantincari aisati coiteaveetatsiri iquempeavacaajeitaca,
iriotaque Tasorentsi vetsicajeitaqueriri apiiteroqueti.
- 3 Yora quenqueshireachari yamaacoventasanotaro covencayetatsiri,
eiro avishimotantaritsi;
irintiquea caari quenqueshireacha, aiqhero irijatatiye
inquemaatsitearo.
- 4 Yora caari shemetatsi aisati pincatsatiriri Tasorentsi,
oshequi timimotasanoterineri,
impincatsayeeteri aisati intime cameetsa.
- 5 Eiro itimitsi cameetsa yora caari cameetsatatsi, oshequi
ompomerentsitimoteari;
irintiquea aamaventacotachari irisati, eiro yantantarotsi
paitapeerica.
- 6 Ocameetsati poameteri cameetsa jananequi ainiroquera ijananequiti;
eiro catsini ipeacotantarotsi ariorica irantearitanaque coajica.
- 7 Yora ashitaarantincari ipincatsariventiri coiteaveeyetatsiri;
aisati pimantatsiri quireequi, ipincatsariventiri
cocotantayetatsiri.
- 8 Yora antirori caari cameetsayetatsi, irosati irineajeri
oashinoncantsipee;
iyora Tasorentsi intsoncasanotantajeari iisanca!
- 9 Yora intacotariri itsipapee, intasoncacoventeeteri iriori;
tempa ipaarantapinitiri yoari coiteaveetatsiri.
- 10 Irojoqueeteririca cantimatantatsiri,
ari ompeanajea antavacantsi aisati tseencantsi.
- 11 Yora pincatsari inecameetsatiri cameetsashiretatsiri,
aisati irishanincatajeari neaveetatsiri cameetsa.
- 12 Yora Tasorentsi icantani yamenacoventiri iotatsiri;
irintiquea icantacoventi itseeya.
- 13 Yora peranti te incoyeji irantaveete, icantashiyeta:
“Anta nianqui avotsi timatsi anteariite maniti icoaque iroyena.”
- 14 Ora tsinane aimentariri ojime oneanaveta cameetsa,
oquempetacaro quianarentsi tsmopinatatsiri ipariantapinitari
yoashinoncairi Tasorentsi.
- 15 Ora iquenqueshireyetiri evancaripee, te ojiteari,
iro cantaincha impasamenteeterica, ario iriotanaje.
- 16 Yora oashinoncairiri coiteaveetatsiri irashitaarantanteari,
aisati pimantiniriri ashitaarantincari, intsoncacotanaquea.

Caratatsiri 30 icantayetiri iotatsiri

17Pinquemavaquero maaroni icantimpiri iotasanotatsiri;
pinquenqueshiretasanotero noametasanotempiri. 18Oncameetsatimotempi

pinquenqueshiretapinitero aisati pampiitapinitero maaroni.

¹⁹Meeca niotacayempiro pimatanteari pishiretasanoteari Tasorentsi.

²⁰Nosanquenatacotaquempiro 30 nocantayetimpiri piotanteari, aisati pinquenqueshiretanteari; ²¹noametasanotempiro piotantearori queariotasanotatsiri, aisati pimatanteari panqueri cameetsa jaanicarica sampitempine.

— 1 —

²²Eiro picoshitiritsi coiteaveetatsiri, pineaqueririca tecatsi timimoterine, aisati eiro poashinoncatashitaritsi cantacoventantatsiriqui caari materone irojocaacoventea.

²³Tempa ario impiacoventaqueari Tasorentsi, iroashinoncaasanoteri jaanicarica oashinoncayerine.

— 2 —

²⁴Eiro pitsipavintsataritsi aisati picarateri caari neashitantacha aisati quishincari,

²⁵pantirocari avirori caari cameetsatatsi yantapinitiri, pashinoncaajeitacari, oquempetimotimpicari pishiticasanotaca.

— 3 —

²⁶Eiro picantiritsi ireevitantatsiri:
“Naro pinacoventempine.”

²⁷Teerica intimimotasanotempi pimpinacoventeriri, aitaque irapitsataquempiro pimaamento.

— 4 —

²⁸Eiro povaayetajirotsi yoaticashitironiri iipatsite intacantajeitaquempiro.

— 5 —

²⁹Yora antaveetasanotatsiri cameetsa, iriotaque antaveetenerine pincatsaripee: eiro yantaveetiniritsi caari neacameetsatatsi.

— 6 —

23 ¹Ariorica iroacayempi neaperotachari, pinquenqueshiretavaqueata cameetsa jaanica oacaquempiro.

²Omavetaquea pinquemasanovetearo pitashe, ocameetsati pamavetero;

³eiro pinevetarotsi ovoshinire paitapeerica yoayevetari; tempa ario iramatavitaquempi.

— 7 —

- 4 Eiro pishintsiventashitarotsi pashitaarantea;
 pimpeacotearo piquenqueshireacotiro.
 5 Ariorica pineasanovetearo ovaararontsi,
 impoiji eiro pineajirotsi; intsipaite ompeanajea
 onquempetanaqueari paquitsa yari.

— 8 —

- 6 Eiro picaratiritsi yoarica mashitsari,
 eiro catsini pinevetarotsi ovoshinire yoayetari,
 7 onquempetimotempi piniaquero iishintsi.
 Incantempirica: “Tsame ayea aisati ire”; iro cantaincha te
 incantasanotempi cameetsa;
 8 impoijini pincamaranajero poavetacari.
 Tecatsi amitacotaquempi cameetsavetachari picantaqueri.

— 9 —

- 9 Eiro pineanatimotiritsi caari iotatsi;
 tempa ario intseencanaquero piovetari.

— 10 —

- 10 Eiro poaayetajirotsi yoaticashitironiri iipatsite intacantajeitaquempiri,
 aisati eiro paitajeitiritsi iipatsite camayetatsiri iriripee;
 11 tempa timatsi Amitacotiriri shintsitasanotatsiri jocaacoventiriri,
 iriotaque piatempine avinti.

— 11 —

- 12 Pincoasanotero pinquenqueshiretero
 aisati pinquemero oametantsi jero iotantsi.

— 12 —

- 13 Eiro poipacairotsi poametiri evancaripee,
 ariorica pipasatiri, eiro oamairitsi;
 14 irointiquea poametanteariri, eiro yashinoncantatsi coajica.

— 13 —

- 15 Notomi, ariorica piotasanotanaque,
 noveshireasanotanaquea, nanaacoteri itsipapee.
 16 Nonquimoshireimentero catsini nonquemaquerorica pineanateri
 queariotasanotatsiri.

— 14 —

- 17 Eiro piquisanentimentiriti antirori caari cameetsajeitatsi,
 irointi pincanteani pimpincatsateri Tasorentsi;
 18 irosati pintimanteari cameetsa,
 aisati poyeacotaqueri, eiro catsini otsoncatsi.

— 15 —

- 19 Notomi, ocameetsati pinquemisantasanote,
 aisati pincoasanote pisavique cameetsa.
 20 Eiro picarajeitiriti shinquitincaripee aisati oashentipee;
 21 tempa yora shinquitincaripee aisati oashintipee ario
 intsoncacotasanaquea coajica,
 aisati iriori perantipee inqitsaashitequiyetanaquea.

— 16 —

- 22 Pinquemisanteri piri, tempa iriotaque timacantaquempiri;
 aisati eiro pitseenquiroti piniro ariorica anteashipatanaque.
 23 Pincoasanotero queariotasanaotatsiri aisati iotantsi jero oametantsi,
 ¡Eiro pipeashitarotsi!
 24 Yora evancari quemisantatsiri aisati iotatsiri intime cameetsa,
 iroveshireacaasanoteari iriri, irineacameetsateri.
 25 ¡Pimatero meca pinquimoshiretacayeri piri
 aisati piniro, piveshireacaajeiteari!

— 17 —

- 26 Notomi, pinquemisantasanotena,
 pinquempetacotena jaoca nocantari;
 27 tempa ora tsinane pashinisato, antashiyetariri shiramparipee,
 oquempetacaro quianarentsi tsompoinatatsiri orijanitenca;
 28 oshequi omanacaari shiramparipee, oquempetacari coshinti,
 opeacaasanojeitantariri atiripee.

— 18 —

- 29 ¿Jaanica ashinoncaachane?
 ¿Jaanica cavintsaachane?
 ¿Jaanica quisavacaachari aisati iraachari?
 ¿Jaanica posantashitachari, tecatsi irantavetea?
 ¿Jaanica quitioncajaquitatsiri?
 30 ¡Iriotaque caari coatsi irojoquero ishinquitapinitaro ovaja
 shintsijatatsiri!
 Icantani iquenacoyetiro ineantayetaro pashinipee ireeyetiri.

- 31 Eiro pinevetarotsi ovaja ariorica oquitioncajati,
aisati pineerorica omareareajati iramentotsiqui; ari pincoanaque
pireero
- 32 Iro cantaincha piraquerorica, ari oashinoncaaquempi,
onquempeteari maranque atsicantatsiri catsitasanotatsiri.
- 33 Pineashiyetanaquearo paitapeerica caari pineapiniti,
aisati pinquenqueshiretashiyetanaquea,
pineanatashiyetanaquearo paitapeerica;
- 34 onquempetimotanaquempi pitetacaro antearo pitotsi
pamajaatacotaque antearojaqui incajare,
pitintacaro otincamiqi jenoqui pishevashevatacotaca,
- 35 Impoiji pincante: “Ipsayeevetaquena, te nonquemacoventeaji;
ipasayeevetaquena, te noneacotavaqueaji;
iro cantaincha notinaantanajari, nojate noshinquitajea aisati”.

— 19 —

- 24 ¹ Eiro piquisanentiritsi caari cameetsajeitatsi,
aisati eiro picoasanotitsi pincarajeiteri;
- ² tempa apatiro iquenqueshiretiro iroantashiyetea,
aisati iquenquetsatocoyetiro irantero caari cameetsatsi.

— 20 —

- 3 Yora iotasanotatsiri yovetsiquiro cameetsa ivanco,
iquenqueshiretasanotiro yoatiquiro cameetsa otincamipee
oquisotantari,
- 4 aisati iotasanoti yaanontasanotaro pinatasanoyetachari
icoasanoyetiri.

— 21 —

- 5 Icameetsati irinti iotatsiri, yanaacotiri shintsitasanovetachari;
ocameetsatasanoti iriotasanote, anaacotiro irishintsitasanovetea;
- 6 tempa ariorica irimanayeetea, irijivate inquenquetsatacaavacaajeitea,
aisati inquemisantasanoteri oamejeitiriri iriotacaajeitanteariri
iranaacotante.

— 22 —

- 7 Yora caari iotatsi te irioteji paita incanteri anta
cantacoventantatsiriqui;
tempa te ontimimoteri iotantsi.

— 23 —

- 8 Yora quenqueshiretapinitirori iroashinoncante,

ari irioyeetanaqueri iriotaque caari cameetsatsi.

9 Ora icoashiyetari caari iotatsi, irotaque caari cameetsatsi;
jtecatsi amavetacoterine cantimatantatsiri!

— 24 —

10 Ariorica pincantashirete ompomerentsitimotempi,
eiro otimimotanjimpi pishintsire.

— 25 —

11 Poavisaacotacantajeri icantacoventetiri iroyeeteri,
aisati covencatacotatsiri incamanteari, poimpacaacoventajeri.

12 Ariorica pincantavetea: “Te nioteji”;
tempa iotaquero yora Amenacoventimpiri piquenqueshiretiri
panteri,
iriotaque pinajeiterine aparopeeni paitapeerica yantayetiri.

— 26 —

13 Notomi, pantsoteri ija pitsi, ipochajatasanoti
pineanteari icenseesajatasanotaque.

14 Aitaque onquempetimotempiri iotantsi aisati quenqueshireantsi,
ariorica pimataquero, eiro pipeatsi,
pintime cameetsa aisati poyeacotaqueri, eiro catsini otsoncatsi.

— 27 —

15 Eiro piquenqueshiretatsi poashinoncayeri cameetsajeitatsiri,
aisati eiro picantitaveetiritsi timimoyetiriri ivancoqui.

16 Omavetaquea oncarate 7 pantacaapiniyeveteari, incanteani
iranaacotero.
Irintiquea yora caari cameetsajeitatsi, irashinoncaasanotea.

— 28 —

17 Eiro piquimoshiretanaquetsi pineeririca quisanentimpiri
ompomerentsitimoteari.

18 Tempa yora Tasorensi eiro ineacameetsatirotsi oca;
aisati eiro yoshinoncairitsi iriori.

— 29 —

19 Eiro piquisashiretatsi pineaqueririca caari cameetsajeitatsi,
aisati eiro piquisanementacotiritsi yashiyetari piatsajeitachari;
aisati eiro picoitayetiritsi yantajeitiri.

20 Tempa yora caari cameetsajeitatsi, eiro ineirotsi cameetsatsisiri;
tecatsi irimate, iquempetacari tsiorontsi tsivacatsiri.

— 30 —

- 21 Notomi, pimpincatsateri Tasorentsi aisati pincatsari,
eiro picarajeitiritsi quisajeitiriri;
22 tempa irotaintsi iroashinoncayeri Tasorentsi jeri pincatsari,
aisati tecatsi ioterone jaoca oncanteari covencatatsiri mapoquerine.

Otsipa icantayetiri ioyetatsiri

- 23 Irosati ocapee icantayetiri ioyetatsiri:
Yora cantacoventantatsiri, te oncameetsateji irinashitacayeteari itsipa.
24 Jaanica cantacoventerine antirori caari cameetsatatsi, incante:
“Tecatsi irantane”,
yora savicayetatsiri nampitsipeequi iroamaimajeiteri,
aisati yora pashinisatipee intseencajeiteri.
25 Irintiquea oashinoncairiri, yora atiripee irineacameetsajeiteri.
26 Yora acantatsiri cameetsa irisampiyeteririca,
iquempetacari tsipavintsatavacaachari.
27 Pijivate poameetsatero ora pipimantayetiri aisati pantaveetasanote
poanequi,
impoiiquea povetsicanonthea pivanco, pisavicanteari cameetsa.
28 Eiro picantacotashiyetaritsi pishaninca tecatsirica irante,
aisati eiro pitseeyacotaritsi.
29 Eiro piquenqueshiretirotsi catsini pimplateari itsipa
iquempetaquempi iriori.
30 Aparo quitaiteri nojataque iroanequi peranti
aisati noquenanaquero irovamashitequi caari quenqueshireacha.
31 Noneanaquero otimasanotaque quitotseequimashi
aisati otantotacovetari mapipee otireayetaque.
32 Noneantacarori, ari noquenqueshireacotanaquero,
irosati notantanacaro noaquero oca oametantsi:
33 Ainiroquera aasanotimpi pivochoquine,
pitaapiniti, pisatevacota, pimaasanotantari;
34 irotaintsi omapoquempi tsoncacotantsi,
oquempetari quenaquenayetatsiri ivetsica irimanatea.

Otsipa icantayetiri Salomón

- 25** ¹ Jero aisati icantayetiri Salomón, isanquenatacotajiri
amitacotiriri Ezequías, pincatsariventajiriri ishanincapeeni Judá.
² Ampincatsatanteariri Tasorentsi; tempa iotasanoti caari imati atiri
irioterero,
aisati ampincatsateri pincatsari coasanotatsiri iriotacoteri
Tasorentsi.

- 3 Tecatsi ioterone jaoca ocarati otsantsati jenoqui otimantari inquite
aisati otsompoinati quipatsi,
aisati oquempeta iquenqueshireantari pincatsari, tecatsi materone
irioterone.
- 4 Yora vetsiquiriri plata, ijivati yojoquiro ivitsivanerepee,
impoi ji yovetsiquiro iramentotsi.
- 5 Aisati inquempetea pincatsari, irojoqueri amitacoyevetariri caari
cameetsatsi,
incanteani impincatsariventante, aisati incantacoventante
cameetsa.
- 6 Eiro pineaperotimotaritsi pincatsari
aisati eiro panaacotiritsi pisavique isavicamentoqui
irioperoyetsiri.
- 7 Ocameetsati irointi incantempi: “Pimpocanaque aca”,
eiro yoashiventantimpitsi pincatsariyetatsiri.
- 8 Paitapeerica pineayevetaqueari, eiro pishiashitanacaritsi intsipaite
cantacoventantatsiri,
paamayeari itsipa intseeeyacotashitempi, impoi ji tecatsi
pincantanaqueri avirori.
- 9 Pojocaacoventempa incantacotashiyeetempirica,
iro cantaincha eiro poinijantitacotiritsi imanaqueri itsipa.
- 10 Jaanica quemaquempine, ari iroashiventaquempi,
inquemacoyetaquempirica, tecatsi pincantacotajea.
- 11 Ora neantsipee ineanayeetiri intsipaite, amitacotanti;
oquempetacaro shiarori chochoqui vetsicachari oro jeri plata.
- 12 Yora iotatsiri iquenquejanti aisati aavaquerori,
oquempetacari aniiyo aisati nenquetsi vetsicachari oro
iyoshitachari.
- 13 Yora camantantatsiri cameetsa, iquimoshiretacairi tianquiriri,
iquempetacaro catsincajencaiteri quitaiteriqui
osarentsiiteasanotirica, oquimoshiretacanti.
- 14 Yora cantashitachari: “Nompashitempi”, iro cantaincha te irimatero
impashitantea,
iquempetacaro mencori tsitenishaatsiri aisati tampea
omparianteameri incani,
iro cantaincha te omateaji.
- 15 Ora oyeacotantsi ocatsimareacantiro quisantsi,
aisati neantsipee cameetsajencatatsiri oveiro shintsijencatantsi.
- 16 Ariorica pineaque pitsi ija, eiro patsotasantiritsi,
yashinentanaquempicari picamarancajiricari.
- 17 Ariorica pinquivanteri pishaninca, eiro pipiashitapinitaritsi;
ishemimpicari aisati inquisanentanaquempicari.

- 18 ꞓYora tseeyacotariri ishaninca
iquempetacaro posamentotsi, sataamentotsi aisati
tsampitsoaquitasanotatsiri chacopi!
- 19 Pishiretearirica aacantantatsiri ariorica ompomerentsitimotempi,
oquempetaca paniitantacaro aparoni pivori carajatsiri, aisati
poantacaro aparo mocatsari paji.
- 20 Yora pampoyeimotiriri oashiretachari,
oquempetaca icachoquitaqueiri ivatsaaro, aisati yaapitsataqueri
iitsaare catsincaiteriquii.
- 21 Ariorica aaqueri quisanentimpiri itashe, pimperi iroyeari;
aisati aasanoaquerrica imire, pimperi irireri.
- 22 Aitaque pincanteriri impashiventantanaqueri,
irio Tasorentsi pinatajempirone.
- 23 Ora tampea quenatsiri quirinca amiro incani,
aisati oquempeta neantsipee caari cameetsatsi,
ocatsimavorotacanti.
- 24 Ocameetsati intime atiri otataroqui pancotsi apaniro,
anaacotiro intimantearo antearoite pancotsi irisavicacantearori
tsinane quishincaro
- 25 Ora camantantsi cameetsatasanotatsiri poneachari otsipaqui
nampitsi,
oimoshirencanti oquempetacaro nija iroaquerajatatsiri irasanotiri
miretatsiri.
- 26 Yora caari timatsi irantane, intsaroacayearirica cantacaarori,
iquempetacaro nija sotoaatatsiri quipatsijari.
- 27 Te oncameetsateji antsoyeteri oshequi ija pitsi,
aisati te oncameetsateji ancoye impincatsatashiyeetee.
- 28 Yora caari iotatsi iramaventacotea yantashiyetaro paitapeerica,
iquempetacaro nampitsi caari tantotacotacha, covencatacotatsiri.
- 26** ¹Te omoncaratavacayea catsincaiteri aisati osarentsiqui,
aisati ompariye incani yaviitanteetarori oitsoquipee;
aisati inquempetea caari iotatsi, te imoncarateari ipincatsayeetiri.
- 2 Ora oamaimatavacaashitantsi, eiro catsini omata oashinoncante,
oquempetacari choriquti peachari
aisati ashivanti caari timatsi imenco.
- 3 Yora cavaayo ipasayeetiri, aisati aashino ishiticavontsoyeteri
inquemisantanteari;
irintiquea caari iotatsi, ocameetsati impasayeeteri.
- 4 Yora caari iotatsi, eiro paquiritsi,
piquempetaricari avirori.
- 5 Yora aquiriri caari iotatsi, ishiavetacari jaoca icanta.
- 6 Yora tianquiriri caari iotatsi incamantante,

- oquempeta itoyetiro iitipee aisati icoayetiro neantsipee.
- 7 Yora mayejaari eiro imatirotsi irijate areejiqiu,
aisati caari iotatsi, eiro imatirotsi yoametantiri iotatsiri.
- 8 Antsipetashitearo ampincatsateri caari iotatsi,
oquempeta atsipetashitaro ashitiquiro mapi varacatsaqui.
- 9 Yora shinquitincari eiro iquemiro onquentero totseequi,
aisati caari iotatsi, eiro imatirotsi inquemero icantiriri iotatsiri.
- 10 Yora manatirori chacopi quentashitariri maaroni avisayetatsiri,
iquempetacari antaveetacairiri caari iotatsi ivancoqui.
- 11 Yora otsiti yoipiario iyamarancaro,
aisati iriori caari iotatsi, yapiitapinitiro caari cameetsatatsi.
- 12 Yora caari iotatsi yanaacotiri yora jitacantashitachari ioti.
- 13 Yora peranti te incoyeji irantaveete, icantashiyeta:
“Anta avotsiqui timatsi anteariite maniti, yoyeaquena.”
- 14 Yora peranti inicacota imaamentoqui,
iquempetacaro shevatacaarori ashitacorontsi, ocantani opiapiata.
- 15 Yora peranti yajiricavetaro yoantari,
iro cantaincha eiro imatirotsi iranquero iraco iroanteari.
- 16 Yora peranti ijitacantashiveta iotasanoti,
yanaacotaqueri caratatsiri 7 iojeitatsiri yaquiro sampitantsi.
- 17 Ariorica irantavacaajeitea irancapaaquerica pashini,
iquempetacari ajiriquiriri otsiti iyempitaqui.
- 18-19 Yora amatavitiriri itsipavintsatari, impoiji icanti: “Irointi
nantavintsatimpi”,
iquempeta shinquiventitari pishonquirori chacopipee amorecatsiri
oamantatsiri.
- 20 Eirorica otimitsi tsitsi, otsivaqui paamari,
aisati eirorica otimitsi cantantsiyetatsiri, ompeanaquea
antavacantsi.
- 21 Ontimerica tsimenquito, irotaque ontimanteari paamari;
ora inchajempequi irotaque amorecanteari;
aisati ontimanteari antavacantsi, intimerica quishincari.
- 22 Ora cantacotantsipee, oquempevetacaro chochoqui,
oshequi icoasanoyetiro iriniyeetero.
- 23 Yora neanavetachari cameetsajenca, iro cantaincha icoaque
iramatavitante,
iquempetacari chomo yovichaacotanteetarori plata.
- 24 Yora quisanentantatsiri imaniro ariorica ineanati,
iro cantaincha timatsi iquenqueshiretiri iranteri caari
cameetsatatsi.
- 25 Eiro piquemisantiritsi ariorica ineanatimpi cameetsa;
tempa ora iquenqueshiretiri iyoshitaca caari cameetsatatsi.

- 26 Omavetaquea irimanavetearo iquisa,
iro cantaincha ari irioyeetaquero iranteri caari cameetsatatsi.
- 27 Yora quianaterone omoro, irisati tetajearone,
aisati titiyeroneri antearo mapi, irisati ompichaja.
- 28 Yora tseeyari te irineacameetsatero queariotasanotatsiri;
aisati neanavetachari cameetsajenca, iponeacantaro eiro
isaviquitsi cameetsa.

- 27** ¹ Eiro pishemetimentirotsi paita panteri osaitequera;
tempa, te pioteji paita avisatsineri.
- ² Te ocameetsateji pineacameetsatashitea avisati,
irintiquea neacameetsatempine pashini.
- ³ Ora mapi aisati impanequi oshequi otenati,
iro cantaincha opomerentsitasanota ariorica inquishea caari
iotatsi.
- ⁴ Ora tsimaajencatantsi oashinoncanti, aisati quisansiti otsoncanti;
iro cantaincha yora tsaneacotantachari, eiro imayeetiritsi
iroimajerenteeteri.
- ⁵ Ocameetsati incantimentasanoyeeteri cameetsa timatsiri irantane,
anaacotiro inintantaveta, terica ironijantero.
- ⁶ Ocameetsati aventeari tsipavintsateeri iroashinoncaavetee.
Irintiquea quisheeri irovetsaveteerica cameetsa, aamaventeari.
- ⁷ Yora quemachari, impincanaqueri ija pitsi;
irintiquea tasheasanotatsiri, impochatimotanaqueri
quepishivetachari.
- ⁸ Yora jayetatsiri areejiqui, yojoquiro inampi,
iquempetacari tsimeeri arayetatsiri areejipeequi, yojocanaquero
imenco.
- ⁹ Ora casancajencatatsiri oimoshirencanti intiriyeetearorica;
aisati oquempeta incanteerica atsipavintsatari, cameetsa
anquimoshiretanaque.
- ¹⁰ Eiro pojoquiritsi pitsipavintsatari aisati itsipavintsatari piri.
Ariorica ompomerentsitimotempi, eiro picantiritsi pirenti.
Ocameetsati paventeari irinti saviquimotimpiri quempeji,
yanaacotiri pirenti savicatsiri areejiqui.
- ¹¹ Notomi, ocameetsati piotasanote, pinquimoshiretacantenari;
irotaque nomatanteariri nanqueri cantanatanari.
- ¹² Yora quenqueshireachari yamaacoventasanotaro covencayetatsiri,
eiro avishimotantaritsi;
irintiquea caari quenqueshireacha, aikuero irijatatiye
inquemaatsitearo.
- ¹³ Yora coatsiri impinacoventeri pashinisati, ocameetsati iraiteri iriori
iitsaare,

irosati impinatantajeariri ireevetiriri.

14 Ariorica povetsatari tsipavintsatimpiri capichajirica quitaite,
picajemacotiririca,
oquempetaca piquisanentaqueri.

15 Ora tsinane quishincaro;
oquempetacaro ovitejapinitantari opariirica incani.

16 Ariorica ancoavetea aimajerentero,
oquempeta acoaveta aimajerentero tampea, aisati ajiricaajaterime
quejtsi.

17 Ora ashiro yameecanteetaro oshaninca,
aisati iriori atiri iroametavacayea.

18 Yora tsameetacotirori inchato iyera, iriotaque oyearone oitsoqui;
aisati amenacoventiriri cameetsa nampitariri,
irineacameetsatasanoteri.

19 Ora iquenqueshireantari atiri, iotacairi jaoca icantari;
oquempetaca yamenaajatiro nija, oconijatanaque ivoro.

20 Ora caamanetantsi, itijanteetari aisati icoasanoyevetari atiri,
eiro catsini ojoquiritsi.

21 Yora oro aisati plata itayeetiri paamariqui, icameetsatantari,
yora atiri iotanteetariri, icantacoyeetiri: Icameetsati.

22 Yora caari iotatsi impasanatapiniyeevetearirica,
eiro yojoquirotsi iquenqueshiretiri caari iotanta.

23 Pamenasanoteri cameetsa povishatepee,
aisati pinquenqueshireacoteri itsipapee pivira;

24 tempa ora yashiyeevetari aisati pincatsariventantsi
eiro ocantani ontime.

25 Ariorica oshiocanaje paashitomashi toncaaripeequi,
irotaque iroajeari povishatepee,

26 aisati ontimasanote iviti pivirapee, pinquitsaajeiteari,
iriotaque pimpimanteri pamanantanteari piipatsite,

27 aisati ontimasanote otsomi: tecatsi coiteimotempine;
irotaque poacaajeiteariri pitomipee jeri pinampirepee.

28 ¹Yora caari cameetsatatsi ishiashita tecatsi oijanavetearine;
irintiquea cameetsajeitatsiri ineaperota, iquempetacari anteariite
maniti.

2 Teerica irisavicajeite cameetsa atiripee,
aiquero yoshequiashitanacari pincatsariyevetachari;
irintiquea pincatsariventantatsiri cameetsa, ioti isavicacanti cameetsa.

3 Yora caari cameetsatatsi oashinoncairiri coiteaveetatsiri;
iquempetacaro antearo incani tsonquirori panquirentsipee.

4 Yora jocajirori icantacantiri Tasorentsi, iveshireimentari yora caari
cameetsatatsi;

- irintiquea yora moncarajeitirori, iquisanentaqueri.
- 5 Yora caari cameetsajeitatsi te irioteroji catsini cameetsayetatsiri;
irintiquea pincatsatiriri Tasorentsi, iotasanotiro maaroni.
- 6 Ocameetsatasanoti eiro ashitaarantatsi, irointiquea ancameetsate,
ashitaarantavetearica, irointi antashiyetearo paitapeerica.
- 7 Yora moncaratirori icantacantiri Tasorentsi, iriotaque evancari
quenqueshireachari;
irintiquea caratiriri oashentipee, yoashiventairi iriri.
- 8 Yora oanairori ovinaro yashiyetari,
impioteneri neshinoncatiriri coiteaveetatsiri.
- 9 Itimirica caari quemisanotiro icantacantiri Tasorentsi,
aisati iriori eiro iquemisanotirotsi iquenquetsatacaavetariri.
- 10 Yora caari cameetsatatsi antacairiri cameetsajeitatsiri caari
cameetsatatsi,
irisati oashinoncaajanchane;
irintiquea caari timatsi irantane, irineero cameetsatatsiri.
- 11 Yora ashitaarantincari ijitacantashitaca iotasanoti;
irintiquea yora caari ashitaarantacha quenqueshireachari,
ario iriotacotaqueri jaoca icantari.
- 12 Ariorica iranaacotante cameetsajeitatsiri, inquimoshiretasanojeite;
ariorica iranaacotante caari cameetsajeitatsi, irimanapitsajeiteari
atiri.
- 13 Yora manacotirori irantane, eiro itimitsi cameetsa;
irintiquea camantacotirori, irojocanajerorica, impeacoyeetajeneri.
- 14 Inquimoshirete atiri pincatsatapinitiriri Tasorentsi;
irintiquea quisoshiretatsiri, irashinoncayempa.
- 15 Yora caari cameetsatatsi pincatsariventirori nampitsi, itimajeitinta
coiteaveeyetatsiri,
iquempetacari anteariiti maniti amoroatsiri, terica meeni
covencatatsiri.
- 16 Yora pincatsariventantatsiri caari quenqueshireatsa cameetsa,
aiquero ijatatii yoashinoncanti;
irintiquea caari neveyetaro paitapeerica, osamani intime.
- 17 Yora oantatsiri tecatsi intacotearine,
aitaque iroyeetajeri iriori.
- 18 Yora savicatsiri cameetsa, tecatsi incanteeteri;
irintiquea caari cameetsatatsi, irashinoncayea.
- 19 Yora antaveetatsiri ontimimotasanoteri iroyeari;
irintiquea caratiriri peranti, incanteani oncoiteimoteri.
- 20 Yora cameetsatatsiri iriveshireimenteteeari;
irintiquea coasanotirori irashitaarantea, iroashinonqueeteri.
- 21 Te oncameetsateji pinashitacantea;

- yora aantariri ishaninca capichaji, yantaquero caari cameetsatatsi.
 22 Yora coanontarori irisati, ishintsiventiro irashitaarantanteari;
 iro cantaincha te irioteji omapoquero coajica oncoiteimoteri.
 23 Coajica pineacameetsatanajeri cantimentimpirori pantane,
 iranaacoteri yora cantimpiri: “Picameetsati.”
 24 Yora coshitiriri ashitariri, aisati cantatsiri: “Tecatsi nante”,
 iriotaque tsipavintsatariri oantajeitatsiri.
 25 Yora coasanotashiyetarori paitapeerica, iriotaque intacantarori
 yantavaca;
 irintiquea shiretariri Tasorentsi, irisavique cameetsa.
 26 Yora caari iotatsi ishemetimentiro iquenqueshireashiyetari;
 irintiquea iotasanotirori yantiri, tecatsi avishimoterine.
 27 Yora amitacotiriri coiteaveetatsiri, tecatsi coiteimotearine;
 irintiquea caari amitacoterine, oshequi incantimayeeteri.
 28 Ariorica iranaacotante caari cameetsajeitatsi, irimanapitsajeiteari
 atiri;
 ariorica incamajeitaque, impincatsariventante cameetsajeitatsiri.

29 ¹Yora icantimenteevetari irantane, ariorica inquisoshiretanaque,
 intspaite intsoncajea, tecatsi incantacotajea.

- ² Ariorica impincatsariventante cameetsajeitatsiri, inquimoshirejeite
 atiripee;
 irompa iriorica pincatsariventantatsine caari cameetsajeitatsi,
 irashinoncaajeitea atiripee.
³ Yora evancari iotatsiri yoveshireacaari iriri;
 irintiquea antayetirori neavintsayetirori shirampari, itsoncashitari
 iireequite.
⁴ Yora pincatsari antirori cameetsayetatsiri, inecameetsatiri
 icarajeitiri;
 irintiquea shintsinatantashitachari impinatanteari quireequi,
 intsoncanceri.
⁵ Yora neacameetsapinivetariri itsipavintsatari,
 irointi icoaque iramataviteri.
⁶ Ora yantiri yora caari cameetsatatsi, irisati ompomerentsitimotajea;
 irintiquea cameetsatatsiri, isaviqui cameetsa, iquimoshireti.
⁷ Yora cameetsatatsiri iquenqueshireacotiri coiteaveetatsiri paitarica
 coiteimoyetariri;
 irintiquea caari cameetsatatsi, te inquenqueshireacoteri.
⁸ Yora coajeitatsiri irantante, iquisacaari maaroni inampiquiniri;
 irintiquea iojeitatsiri, imajereti eiro iquisavacantatsi.
⁹ Yora iotatsiri, ariorica irineaveeterica caari iotatsi,
 inquisanaquero, irishirontimenteari,
 aisati eiro imatirotsi irovetsiquero.

- 10 Yora oantatsiri iquishiri cameetsatatsiri;
icoasanoti iroyeri.
- 11 Yora caari iotatsi iquisasanota, te irioteji irimajerete;
irintiquea iotatsiri, intsipaite iroimajerentajeiteri.
- 12 Yora pincatsariventantatsiri quemisantashiyetarori tseeyantsipee,
yantacayetaqueri iriori amitacojeitiriri.
- 13 Yora yoashinonqueetiri aisati oashinoncantavetachari
iquempeavacaajeitaca,
ipaqueri Tasorensi yamentantari apiiteroqueti.
- 14 Ariorica yojocaacoventiri pincatsari cameetsa yora coiteaveetatsiri,
incanteani impincatsariventante.
- 15 Impasayeeterica aisati incantimenteeterorica antaqueri, ari
ayotanaje;
irintiquea jananequi caari yoameyeeti, yoashiventairo iriniro.
- 16 Ariorica yoshequiasanojeitanaque caari cameetsajeitatsi,
ontimasanotanaque caari cameetsatatsi;
irintiquea cameetsajeitatsiri irineeri intsoncajeitea.
- 17 Poameteri pitomi irisavicacantantempiri cameetsa,
aisati oshequi iroimoshirenquempi.
- 18 Teerica ontime oametantsi icantiri Tasorensi, eiro iotitsi paita
irantajeiteri atiri;
irintiquea moncaratirori icantacantiri, inquimoshirejeite.
- 19 Eiro amatirotsi anquenquejayeri aneanequi yora peranaronsi,
inquemavetaquea, iro cantaincha eiro iquemisantitsi.
- 20 Yora caari iotatsi yanaacotiri neaveetashiyetachari caari
quenqueshireacha.
- 21 Yora caari oametiri inampire ainiroquera ijananequitapaini,
eiro ipincatsatiritsi, ari iroashiretacaaqueari.
- 22 Yora quishitatsari shintsini, iriotaque poneacantarori yantavacaa;
aisati oshequi yantayetiro paitapeerica.
- 23 Yora shemetatsiri, iroashiventeteri;
irintiquea caari shemetatsi, impincatsayeeteri.
- 24 Yora caratiriri coshinti iquisamentaja irisati;
omavetaquea inquemacoyevetaquearo iroamaimayeeteri, eiro
icamantacotirotsi.
- 25 Ora oimintsaroiriri atiripee, irotaque jocairiri;
irintiquea shiretariri Tasorensi, yojocaacoventiri.
- 26 Oshequi jatashitiriri pincatsari icoacotiri iramitacoteri;
iro cantaincha apaniro Tasorensi icantacoventanti cameetsa.
- 27 Yora cameetsajeitatsiri te incoyeji intsipateari caari cameetsajeitatsi;
aisati iriori caari cameetsajeitatsi, te incoyeji intsipateari
cameetsajeitatsiri.

Icantayetiri Agur

- 30** ¹Yora Agur, itomini Jaqué Masaquiniri, icantiri Itiel jeri Ucal, icantajetiri:
- ² Te niotasanoteji catsini, nanaacotaqueri itsipapee te nioteji.
Te ontimimotena noquenqueshireantari.
- ³ Te ontimimotenaji iotantsi; te catsini niotacoteriji Tasorentsi cameetsatasanotatsiri.
- ⁴ ¿Jaanicampa matirori ijati inquitequi aisati ipiajaro aca quipatsiqui?
¿Jaanicampa matirori tampea yajiriquiro?
¿Jaanicampa matirori incajare yampinaiquiro iitsaarequi?
¿Jaanicampa oaquerori overapaaca quipatsi?
¿Jaanicampa iotirori ivajiro aisati ivajiro itomi?
Piotirompa, pincantename.
- ⁵ Yora Tasorentsi yojocaacoventiri shirejeitariri;
oqueariotasanotaque maaroni icantasanotaqueri, ocameetsati ashirejeitearo.
- ⁶ Eiro catsini povaayetajirotsi icantaqueri;
tempa ari incantimentaquempiro, aisati incantempi, avinti tseeyari.
- ⁷ Notasorentsite, ocarati apite noncoacotempiri,
pimatasanotenaro tequerata meeca noncame:
- ⁸ pojocaacoventenaro caari queariotatsi aisati tseeyantsi,
eiro pishinetanatsi nashitaarantea aisati noncoiteayete;
irointi pimpenaro coiteimotanari noyeyari.
- ⁹ Ariorica ontimimotasanoyetena paitapeerica,
aitaque nompeacotanajempi, noncante: “Te niotempiji”.
Ariorica oncoiteimotaquena, ario noncoshitaque,
aitaque nontseencanaquempi.
- ¹⁰ Eiro picantimatiritsi iperanyeetari, iquemimpicari peranatariri;
tempa ario incantimatanaquempi iriori, impojji
pashinoncaimentearo pantaqueri.
- ¹¹ Ainiro atiri oamaimatiriri iriri,
aisati te irineacameetsatero iriniro.
- ¹² Ainiro jitacantashitachari icameetsajeiti;
iro cantaincha te irojoquero irantane.
- ¹³ Ainiro jitacantashitachari irioperotasanojeiti;
irotaque itseencajeitantariri itsipapee.
- ¹⁴ Ainiro timatsiri isataamentopee, iro timimoterineme irajipee,
aisati iotsirojaniquitepee, iro timimoterinemeri itsitipancanaaji,
intsoncasanotanteariri coiteaveetatsiri nampitsiquiniri.
- ¹⁵ Yora penta timatsiri apite irishinto,

apaniro ioti ocoacotantapiniti.

16 Ainiro caratatsiri 4 apanivanimotirori ocoiri:

ora omoro yoanteetariri camatsiri,
 ora tsinane shiravaro,
 ora quipatsi pirijatatsiri,
 jero paamari coasanotatsiri tsitsi.

17 Yora caari neacameetsaterine iriri aisati shirontimentarori iriniro

anteashipataquerica,
 ocameetsati inquitsoreajaquiteri iroquipee tisoni aisati paquitsa
 iroyeari intsonqueri.

18-19 Ainiro caratatsiri 4 oacaanari cavaco caari nomati niotacotero jaoca
 icantajeitari:

jaoca icanta paquitsa yarayeti jenoquinta,
 jaoca icanta maranque inoshica imperitaqui,
 jaoca icanta antearo pitotsi avishiro incajare,
 aisati jaoca icantari shirampari tsipatarori tsinane.

20 Jero ocantari tsinane aimentariri ojime:

antaqueririca shirampari impoiiji oncaataje, ari oncante: “Tecatsi
 nante.”

21 Ainiro caratatsiri 4 caari yamaveyeeti oimintsaroiriri atiripee:

22 yora nampirentsi pincatsaritanajantsiri,
 yora caari iotatsi otimimotasanotiri yoari,
 23 ora tsinane caari icoyeeveta, aajantsiri ojime,
 yora nampirentsi poyeetanajearone nampitarori.

24 Aca quipatsiqui timatsi caratatsiri 4 irijaniquiyevetachari
 iotasanoatsiri, yanaacotiri ioyevetachari:

25 yora sancoripee oshequianti ini, te irishintsiveteaji,
 icantani ipiononta iroanaro osarentsiqui;
 26 yora quiimapee te iroshequitasanoveteaji,
 iro cantaincha itimajeiti oshetayeti imperita;
 27 yora tsinaropee, te aneajeiveteariji jivaterine,
 iro cantaincha cameetsa iquisoavacaajeita jaocarica irijateri;
 28 iro cantaincha macotajaniquipee yajiriqueetiri acotsiqui,
 aisati yareeta ivancoqui pincatsari.

29 Ainiro caratatsiri 4 caari tsaroatsi, neaperotachari yaniijeiti:

30 yora anteariite maniti covencatatsiri, tecatsi materine
 iroimishiyeeteri aisati tecatsi ampitetearine;

31 yora teapa shemetatsiri,
 yora shirampari chiivo,
 aisati pincatsari jivatacairiri manajeitachari.

32 Teerica pioteji pijitacantashitaca avirori pipincatsariti,
 aisati picoashitaca pantero caari cameetsatatsi;

ocameetsati pinquenqueshirempa.

- 33 Ariorica pimpishaajateri otsomija vaca, ari paavaque orejipatsa, aisati pantisanquerica shintsi piirinaqui, osotoantanaque piraja; pinquisacayemparirica itsipa, ari pantantaque.

Ocantayetiriri iriniro Lemuel

- 31** ¹ Jero ocantiriri iriniro Lemuel, pincatsaritatsiri Masaqui:
² Notomi, pinquemisantena, narotaque timimpiri; tempa iquemaquena Tasorentsi nocantasanotaqueri, irotaque notimantaquempiri.
 ¿Paita noncamantempiri pashini?
³ Eiro pishintsitimentiro pincoashiyetearo tsinanepée; tempa irotaque peacaajeitariri pincatsariyetatsiri,
⁴ Aisati te oncameetsateji, Lemuel, yora pincatsari aisati jivatacantayetatsiri irirayetero ovaja jero shintsijayetatsiri;
⁵ tempa ario impeacojeitanaquearo icantacoventanti cameetsa, eiro ineshinoncatanajiritsi caari piacoventachane.
⁶ Aitapaaque pirayetaquero ovaja cachojatatsiri aisati shintsijayetatsiri; irointi irajeitiri oashirejeitachari.
⁷ Irirajeiterorica, eiro iquenqueshireanajirotsi, intsoncacotea aisati irashinoncaajeitea.
⁸ Pincantacoventeri cameetsa yora itsenqueetiri; ¡pimpiacoventeari yora caari piacoventachane!
⁹ Pincantacoventeri aisati pamitacoteri; ¡pojocaacoventeri coiteavetatsiri aisati caari piacoventachane!

Ineacameetsayeetiro tsinane cameetsatatsiri osaviqui

- 10 Pomerentsi aneantearori tsinane savicatsiri cameetsa; ¡anaacotiro mapijaniquee pinatasanovetachari!
 11 Yora ojime te iraamayemparo paita antayereti, aisati te oncoiteimoteariji paitarica aayetiri.
 12 Ocantani maaroni quitaiteripeequi oveshireacaari ojime.
 13 Ojati amananti iviti ovisha jero lino, cameetsa oquimoshireventiro antaveeyetiri.
 14 Oquempevetacaro antearo pitotsi poneatsari areejiqui amayetirori ovararontsipee.
 15 Otinaita tequerata onquitaiteaje, ocoventiri otomipee aisati onampirepee.
 16 Amenanontiro quipatsi cameetsatatsiri aisati amanantiro, ora aantayetari antaveerequi, irotaque amanantantayetari opanquiyetiri ovamashi.

- 17 Ocantani oshintsiventiro antaveeyetapiniti quitaiteripeequi.
 18 Amenacoventiro cameetsa opimantayetiri,
 ocantani antaveeti irosati ontsitenitanaje.
 19 Irosati quiricayetatsi aisati otijayeti quitsaarentsipee.
 20 Ocantani amitacotiri ashinoncaincari aisati coiteaveetatsiri.
 21 Te onquenqueshireacoteriji otomipee ayeri iyatsincare; tempa
 otijanontayetiri iquitsaatari.
 22 Irosati antanontacha ovashicaropee
 aisati oquitsaataro jentamaotasannotatsiri.
 23 Yora ojime iotasanotiri inampiquiniri,
 aisati ipincatsatasanoyeetiri.
 24 Aisati otijayetiro quitsaarentsi jeri shintoropee,
 opimantayetiniri amanantayetatsiri.
 25 Ocantani oshintsiventiro antaveetapiniti aisati ipincatsajetiro
 oshanincepee;
 te onquenqueshireacotero avisayetatsineri quitaiteripeequi.
 26 Ocantani oneanatantaro cameetsa iotantsi,
 aisati onintasanoyeitiri oamejeitiri.
 27 Cameetsa amenacoventasanotiro timimoyetirori ovancoqui,
 te catsini oacotantayeteaji, irosati antaveenontacha.
 28 Yora otomipee aisati ojime ineacameetsatasanotiro; icantiro:
 29 “¡Oshequi onaveta tsinanepée savicatsiri cameetsa,
 iro cantaincha panaacotasannotiro avinti!”
 30 Ocameetsavoroveta tsinanepée aisati oanencayeveta,
 iro cantaincha amatavitanti, ari ompeanajea;
 iointiquea tsinane pincatsatiriri Tasorentsi,
 ocameetsatasanoti; iriveshireimenteatáro.
 31 ¡Pincantacotero maaroni nampitsiquiniri: “Ocameetsataque”!
 ¡Piveshireimentearo maaroni omayetaqueri!